



सत्यमेव जयते

Gender Mainstreaming In Disaster Management



Prepared
for
State Disaster Management Authority, Meghalaya
By
Ms. Maitreyee Mukherjee

Gender Mainstreaming In Disaster Management

Ms. Maitreyee Mukherjee-ni Segipa Ki-tap

Meghalaya State Disaster Management Authority

C/O Directorate of Land Records and Survey

Lower Lachumiere, Shillong-793001

Phone: 0364-2503022 (0) 2502188

Fax: 0364-2226671 (0)

Email: eo.sdma-sdma@nic.in/ sdmadeptt007@gmail.com

State Disaster Management Authority, Meghalaya, 2014

Ia chapa ka-gimin kitap-ko nang-ni u-ianiko aro skia poraianiko baridapatna jakkalbo aro iani bidingo chingna u-iatpilbo.

CHAPA KA-GIPA:

Meghalaya State Disaster Management Authority
C/o Directorate of Land Records and Survey
Lower Lachumiere, Shillong-793001
Phone: 0364-2503022 (O) 2502188
Fax: 0364-2226671 (O)
Email: eo.sdma-sdma@nic.in/sdmadeptt007@gmail.com

- Chapa Ka-na Chimonge Tarigipa** : Ms. Maitreyee Mukherjee
C/O Mr. Madam Bhattacharjee
Near ICFAI University, Malki-Dhankheti,
Shillong, Meghalaya-793001
- Cover** : Mr. Surajit Bordoloi
- Chapa Ka-chakgipa Biap** : Eastern Panorama Offset, Keating Road, Shillong-793001
Contact no: 0364-2504885

Ning-o Gnanggipa

Ning-o Gnanggipa	i-ii
Kan-dike Aganani	iii
Ra-chakani	v
BAK I: DAL-BEA DUK-A-SEL SOKANIRANG ARO DISASTER MANAGEMENT	1-6
1.1 Ma-sisogija Rang-gitik Obosta Sokani	1
1.2 Ma-sisogija Rang-gitik Obosta Sokani Gadangrang	1
1.3 Dal-bea Duk-A-sel Sokani	1
1.4 Dal-bea Duk-A-sel Sokani Chinrang	2
1.5 Dal-bea Duk-A-sel Sokani Ja-mano Ong-gipa Obostarang	2
1.6 Dal-bea Duk-A-sel Sokani Rokomrang	2
1.7 Gimaani	3
1.8 A-selo Ga-akna Altuani	4
1.9 Kenbeani	4
1.10 Disaster Management:	5
1.11 Disaster Management: Gadangrang aro Ong-taitaigipa Obostarang	5
BAK II: DISASTER MANAGEMENT-O ME-A-ME-CHIKNI APSAN CHANCHIANIKO NANGANI	7-10
2.1 Disaster Management-na Me-a-Me-chikni Re-mikkangani	7
2.2 Me-a-Me-chikni Bidingo U-ininggipa Disaster Management-ni Pangchakanirang	7
2.3 Disaster Management-o Me-a-Me-chikni Bidingo Che-em Che-em Nianiko Dakani Gamchatanirang	7
2.4 Duk-A-sel Sokanirang Me-a-Me-chikni Dingtanggrikanio Nangtinggrikani	8
2.5 Maina Me-chik/Me-chikmarangara Duk-A-sel Sokanio Saknaaniko Man-a Altubea?	8
2.6 Duk-A-sel Sokani Somoio Me-chik/Me-chikmarangna Cholni Kelkirang	9
BAK III: A-SEL OBOSTA SOKANIO DAKCHAKANIKO ON-ANI SOMOIMITINGO RANG-SAN KAM KA-ANIRANGNA ME-A-ME-CHIKNI BIDINGO U-ININGANIKO NANGANI	11-17
3.1 Dakchakaniko On-gnigiparangko Sualani	11
3.2 Cha-ani-Ringanirangko Chimonge Donsoani	11
3.3 Me-chik/Me-chikmarangni Dingtangmancha Nanggnirangko Man-atani	12
3.4 Me-chik/Me-chikmarangni Jaanti Bewal Nikanio Nanggnirangko Man-atani	13
3.5 Dikdiksa Somoina Dongchakani Nokrangko Tarisamsyani	13
3.6 Paikana aro Auchakani Biaprangko Tarisamsyani	14
3.7 An-seng Baljokanina On-gnigipa Cholrangko Sandie Donsamsyani	15
3.8 Me-chik/Me-chikmarang aro Bi-sarangna Chel-chakani aro Naljokaniko On-ani	16
3.9 Gisikni Gita Agankupattianiko On-ani Cholrangko Tarisamsyani	17
BAKIV: DUK-A-SELSOKANIJA-MANNAMPILAONARA-BAANISOMOIMITINGORE-BAENGGIPA ANTIRANGO ARO JARANGO KAMRANGKO KA-ANI-DAKANI	18-20
4.1 Camp-rangko aro Dikdiksa Somoina Dongchakna Rikgipa Nokrangko Nirokani	18
4.2 Nosto Ong-ani ba Gimaanina Tangka On-skaanirang aro Nampilaona Ra-baani Cholrang	18
4.3 Nokdangni Skotong Ong-ani Pangchakaniko Bonatani/Gimaatani	19
4.4 Dakchakani On-ani aro Nampilaona Ra-baani Cholrangni Bidingo U-iataniko On-ani	19
4.5 Bi-sarangna Poraia-Skiani Cholrangko On-ani	20

BAK V: DUK-A-SEL SOKANI JA-MAN RIKPILTAIANIKO DAKANI SOMOIMITINGO ADITA JARANGNA ARO BILSIRANGNA KAMRANGKO KA-ANI-DAKANI

	21-27
5.1 Nampilaona Ra-bana aro Rikpiltaiianiko Dakna gita Chanchianirang	21
5.2 Me-chik/Me-chikmarangni aro Nokdangni Nanganirangna Dongchakani Nokrangko Rikpiltaiiani	22
5.3 A-a, Nok aro Gamjinni Nokgipa Ong-ani Bilrang	22
5.4 Janggitangani Cholrangko Man-ani	23
5.5 Me-chikrangna Uamangni Man-gnigipa Bilrangni Gimin U-iatani	24
5.6 Me-chikrangna Uamangni Man-gnigipa Bilrangko Mamung Champengani Gri Man-atna Uamangna Didianiko aro Bilko On-ani	24
5.7 Saknaa Man-a Altugipa aro Gamchate Ra-ako Man-gijagipa Dolrangna Chel-chakaniko On-ani	25
5.8 Segri Me-chikrangona aro Me-chikrangchi Chalaigipa Nokdangrangona, Be-enni Bilgrianiko Man-gipa Manderangona aro Budepa-Butchumarangona Sokani	26
5.9 Me-chik/Me-chikmarangna Chel-chakaniko On-ani – Duk-A-sel Sokanio aro Dakgrik Dinggrikani Somoirango Saknaaniko Man-giparang	26

BAK VI: ME-A-ME-CHIKNI BIDINGO U-IANI ARO SONGSALNI GADANGO CHANCHISAMSOANIRANGKO DAKANIO JA-RIKNA NANGGNIRANG

	28-36
6.1 A-songrangni Kam Ka-anirang	28
6.2 A-songni Kam Ka-anirang	28
6.3 Dingtangmancha Ja-ku De-anirang	28
6.4 Camp-ko Simsak-Nirokani	29
6.5 An-seng-Baljokani Cholrangko Man-ani	30
6.6 Nosto Ong-ani aro Gimaanina Dakchakani Gita Tangka On-pilskaanirang	31
6.7 Me-chik/Me-chikmarangna Donchakani Nok/Biaprang	31
6.8 Me-chik/Me-chikmarangna Janggitangani Cholrang	32
6.9 Me-chikrangna Bilko On-ani	33
6.10 Be-enni Gita Bilgrianiko Man-gipa Manderangna Apsan Cholrangko On-ani aro Uamangni Chu-gimik Bakko Ra-ani	34



SHRI H.B.MARAK, IAS,
EXECUTIVE OFFICER
STATE DISASTER MANAGEMENT AUTHORITY
MEGHALAYA, SHILLONG



Lower Lachumiere
Shillong-793001
Phone-2503022/2502188
Fax-0364-2503022
Email: hubertmarak@gmail.com/ eo.sdma-meg@nic.in

Dated Shillong, the 1st June, 2015

KAN-DIKE AGANANI

Me-a-m-echik, duk-a-sel sokani somoiorango obostako nampilaona aro tom-tomaona ra-baanio, mongsonggipa ong-a. Iani gamchatani je duk-a-sel sokani ja-mano me-a-me-chikna dingtange on-e ra-a ba watchanga man-aniko chagrongarangoni batroroenga. Me-a-me-chik inon me-asa aro me-chikrangko man-gopa, indiba me-a-me-chikko dingtange on-e ra-ako man-ani aro watchanga man-ani bang-bata changon me-chikranga obostao ga-akronga maina uamang songsalo saknaa man-a altubatgipa doloni ong-a. Unbaksanaba, duk-a-sel sokanio me-a-me-chikna dingtang dingtang ma-eke nangchakeanirang gnang jean duk-a-sel sokanirango me-asa aro me-chikrang an-tangtangona nangchakegipa aro chagronggipa obostarangko u-ia. Duk-a-sel sokanio chel-chakani kamrangko ka-giparangna nambate u-ibataniko sokatna gita Ms. Maitreyee Mukherjee, Consultant, "GENDER MAINSTREAMING IN DISASTER MANAGEMENT" ki-tapko tariaha aro ian duk-a-sel sokanio me-a-me-chikni apsan chanchianiko nanganiko gipatrorona dakchakaniko on-gen ine Anga ka-donga.

Ian Meghalaya State Disaster Management Authority (SDMA)-ni indakgipa mongsonggipa ja-pang kattani bidingo skanggipa chapa ka-chengani ong-a aro Anga ka-donga je ian disaster management-o kam ka-enggiparangna Me-a-Me-chikni Apsan Chanchianiko Nangani Bidingo (Gender Mainstreaming) u-idapaniko on-anio dakchakgnigipa ong-gen.

(Shri H. B. Marak, IAS)
Executive Officer
State Disaster Management Authority
Meghalaya, Shillong

Ms. Maitreyee Mukherjee



MSW, Tata Institute of Social Science (TISS)
Mumbai
MA, Development Studies and Gender, University of Leeds,
United Kingdom
maitreyee_8@rediffmail.com
maitreyee@hotmail.co.uk

Ra-chakani

Anga State Disaster Management Authority (SDMA), Meghalaya-ko ia ki-tap-ko seanio, tarianio dakchakaniko on-anina mitelpilskaaniko on-a namnika.

SDMA-ni officer-rang ia kitap-ko matchotatna gita gimikni gitan chu-gimik dakchakaniko on-aha. Anga, mongsongbate Executive Officer, SDMA, Meghalaya, Shri H. B. Marak-ko ia ki-tap-ko tarianio pilak gadangon nambegipa aganku-pattianirangko on-anina uni dakchakani aro on-paanirangko ra-chaka. Ia ki-tap-ko tarianio uni didianiko on-anirang aro bakrime kam ka-anirang ia ki-tap-na dingtangmancha ortoko on-aha.

Dingtang dingtang non-governmental organization-rangni memberrangna, songsalo donggipa organization-rangna aro me-chik dolrangna jemangan disaster management-ni bidingo kamrangko ka-engachim, uamangko an-tangtangni gamchatgipa somoirangko on-anina aro dingtang dingtang disaster management programme-rangko a-bachengatani bidingo aroban me-chikrangni aro be-en-ni gita bilgrianiko man-gipa manderangni apsan chanchianiko nangpaani bidingo an-tangtangni u-ianirangko on-gilpaanina aro nambea ku-pattianirangko on-anina dingtangmancha mitelpilskaaniko on-a kusi ong-bea. Uamang ang-na dingtang dingtang lekka panjarangko, chapa ka-gimin ki-tap-rangko aro report-rangko sandina gita dingtangmancha dakchakaniko on-aha.

Anga, Angni adita bilsirangna disaster management agency-rang baksa bakrime kam ka-anirango India gimiko bang-bea duk-a-selo ga-akgipa me-a-me-chikrang aro bi-sarangni relief camp-rango donge an-tangtangni neng-nikanirangko chagronganirangko on-gilpaaniko ra-chake dingtangmancha mitelpilaniko on-a namnika. Uamangni ka-dongani angna dingtangmancha ia ki-tap-ko tarianio didianiko on-dapaha.

DAL·BEA DUK·A·SEL SOKANIRANG ARO DISASTER MANAGEMENT

1.1 MA·SISOGIJA RANG·GITIK OBOSTA SOKANI

Ma·sisogija rang·gitik obosta sokani ua somoiko miksonga jeon manderangni nanganirangna dakchakaniko on·a, janggitanganina cholrangko on·a, aro gam·jinrangna chel·chakaniko on·a gita aiao inmanpilgipa kamrangko ka·a·daka jean duk·a·sel sokna skang, duk·a·sel sokanina mikrakatsoani, duk·a·sel sokanina dakchakanirangko on·ani aro nampilaniona ra·baani kamrangko ka·ani somoirango ong·naba gnang (Church World Service, 2000).

1.2 MA·SISOGIJA RANG·GITIK OBOSTA SOKANI GADANGRANG

Ma·sisogija rang·gitik a·sel obosta sokaniko ming dok dake bak ka·na man·a:

Gelna man·telgija rang·san sokgipa: Banggria, balminduri, volcano (wa·alni abri) aro chi bana re·achi ong·a. Ia a·sel sokani ong·kame dongja.

Technology·ni a·selo sokgipa: Wa·al cha·bakninggipa, chemical aro nuclear a·sel ong·anirang; u·ianirango, re·a·doanirango champenganiko man·ani.

Ka·sne sokgipa: Gelna man·gija ong·telaigipa obostarangni a·selo jekai akal·karap aro jinmana gipgipa sabisi ba jo·onrangni nosto ka·anirang.

Pangnajolna ong·kame donggipa: Kangal cha·asiani a·selo ong·gipa jenan namroro·silrooaniko nangchongmota.

Bang·bea manderangko dingtangrikatani, ekgrikatani ba brangatani: Ian gipin rokkomni sokgipa obostani a·selo ong·a.

Bringipa ba ma·sina neng·gipa obostarang: Mongsongbate meligrikijani ba jegrikani a·selo jean dakgrik·dingrikani, ka·mikenatani aro man·dikatani baksana ong·chapa.

1.3 DAL·BEA DUK·A·SEL SOKANI

Duk·a·sel sokani ua dal·begipa aro mongsonggipa somoiko miksonga jeon obosta, mandeni a·selo ba an·tangari ong·telaigipa, gitik gitak ba ka·sne ong·rorobani jean songsalo tom·tome janggitanganiko bringbrangate manderang, bosturang ba wilwilao donggipa a·a·chi bol·wa·a matburingrangna nosto ong·aniko ra·baa aro jeon obostao ga·akgipa songsalni manderangko an·tangtango gnanggipa cholrangchi mangmang an·tangtangna naljokna aro cholina gita cholrangko on·a (Kent, R., 1994).

Dal·bea duk·a·sel sokani aro ma·sisogija rang·gitik a·sel sokaniko sregrike jakkalgenchimoba, dal·bea duk·a·sel sokaniara ma·sisogija rang·gitik a·sel sokanini dingtanggipa bak sa ong·a ine u·ie ra·na nangchongmota.

Duk·a·sel sokaniko nosto ong·anio aro gimaanio, je ua mandeni janggi ba gam·jinni ba minggnini nosto ong·ani aro gimaanio pangchakesa chanronga. Duk·a·sel sokaniko kenbeanirangko name dake nirokna man·gijani a·selo ong·a ine nikrongbata. Ia kenbeanirangara gimaani aro a·selo ga·akna altuani bidingo ong·katgipa ong·a.

1.4 DAL·BEA DUK-A·SEL SOKANI CHINRANG

Dal·bea duk-a-sel sokaniara ia ka-mao on-gipa chinrang gnang:

- Agansamsona man-gijagipa
- Ma-sigijagipa ba u-igijagipa
- Tarakgipa
- Rangsang dakna nanggnigipa
- Kenchakani gnanggipa
- Mikkraksona nanggipa

1.5 DAL·BEA DUK-A·SEL SOKANI JA·MANO ONG·GIPA OBOSTARANG

- Janggi gimaani
- Saknaa man-ani
- Gam-jin, tangka-paisa, ge-a-gamani nosto ong-ani/gimaani
- Tom-tom janggitanganiko champengani
- Wilwilao donggipa a-a-chi, bol-wa-arangni nosto ong-ani

1.6 DAL·BEA DUK-A·SEL SOKANI ROKOMRANG

Dal·bea duk-a-sel sokanirangara gelna man-telgijagipa ong-telaigipa ba mandeni a-selo ong-a aro ian ia bakrangoni ong-a:

Biological

- Bacteria-ni a-selo
- Virus-ni a-selo
- Fungal-ni a-selo
- Cha-ani nosto ong-ani

Chemical

- Bisi gnanggipa gas aro Nuclear Radiation
- A-ako rongtlatja ba nosto ka-ani aro Jo-ong siatna jakkalgipa samrang
- Chi-ko rongtlatja
- Cha-ani nosto ong-ani

Geological

- Banggria
- Bank kaa nosto ong-ani/Ban kaa bretani ba be-ani

- A-a begruani aro A-mang Rurongani

Chi aro Ding-a-Sinanio Ong-gipa

- Balmindurirang
- Mikka Kimpretanirang
- Chi Bana Re-anirang
- Stil Onanirang
- Sin-gipa Balwa Sokanirang
- Suri Be-gruanirang
- Ding-gipa Balwa Sokanirang
- Akal-Karap Ong-anirang
- Ta-rakgipa Balmindurirang
- Tsunami-rang

Mandeni A-selo Ong-gipa

- Rail A-sel Ong-anirang
- Ramao A-sel Ong-anirang
- Chi-o Ring Sripanirang
- Aeroplane ba Helicopter A-sel Ong-anirang
- Koila A-kol-o Chi Mripanirang
- Koila A-kol-ni Be-gruanirang
- A-song aro A-dokni Kosako Bobil Dake Chakatgiparang
- Jajaani aro So-sojengjeng Ong-ani A-selo Manderangni Biapko Wate Galanirang
- Sagalo To Jokanirang
- Buringo aro Jilla-o Wa-al Kamanirang

1.7 GIMAANI

Gimaaniara gelna man-gija an-tangari ong-telaigipa ba mandeni a-selo ong-atgipa obostaoni ong-a jean manderangna aro wilwilao donggipa a-a-chi, buring-bolgrim aro matburingna neng-nikaniko ra-baa aro name simsak-nirokaniko dakjagenchim ong-ode duk-a-sel ong-aniona sokata.

Gelna man-gija ong-telaigipa gimaani sokanirang:

- Banggrianirang
- Tsunami

- Abri-oni Wa-al Ong-katanirang (Volcano)

Mandeni A-selo Ong-atgipa Gimaanirang:

- Badingani bosturangko tariani biapo ba karkanao a-sel ong-anirang
- Rail, rama aro aeroplane ba helicopterni asel ong-anirang
- A-song ba A-dokni kosako bobil dake chakatgiparangni chadrapanirang
- Dam nosto ong-ani
- Bisigrakgipa jabolrangni jokani

Songsalna Gimaaniko Ra-bagiparang:

- Chi Bana re-anirang
- A-a Be-gruanirang
- Akal-Karap Ong-anirang

1.8 A-SELO GA-AKNA ALTUANI

A-selo ga-akna altuaniara be-en bimango, songsalo, namroro-silroranio aro wilwilao donggipao pangchaka, jechin songsalko gimaaniona sokatna altubatata (Living with risk, UNISRD, 2002).

Duk-a-selo ga-akna altugipa manderang:

- Kangalgipa nokdangrang
- Nokko saksan chalaigipa nokdangrang
- Songsaloni watchangako man-gipa nokdangrang
- Songo gital songdongna re-bagiparang, a-song gipinoni songdongna re-bagiparang, a-song gipini manderang
- Budepa-butchumarang, bi-sarang aro dal-drobaenggipa bi-sarang
- Sabisi man-gipa ba gisikni gita ba be-en-ni gita bilgrianiko man-gipa manderang
- Segate dongkugijagipa songdonggiparang; refugee-rang; a-song dakgrikanio ru-ute kam ka-bagipa manderang (war veterans)
- Dingtanggipa jatni manderang aro watchangako man-gipa dolrang
- Manderang jemangan an-tangtangni noktangtango dongja
- Me-chik/Me-chikmarang

1.9 KENBEANI

Kenbeaniara namgijagipa obostarang sokaniko nisamsyani ong-a, ba ma-sisogipa gimaanirang (janggi gimaani, saknaa man-anirang, gam-jin nosto ong-ani ba janggitangani cholrang gimaani, bading chiwalanio champengani ba wilwilao donggipa a-a-chi, buring-bolgrim nosto ong-ani aro

matburingrangni gimaani) jean gelna man-gijagipa an-tangari ong-telaigipa obosta ba mandeni ong-atgipa obostani a-selo aro a-selo ga-akna altuanirangni nanggrimanichi ong-a (Reducing Disaster Risk, United Nation Development Programme, 2004).

$$A\text{-SELO GA-AKNA ALTUANI} = \text{MANDERANG} + \text{ONG-A OBOSTA} + \text{A-SEL} + \text{SOMOI}$$

$$\text{KENBEGNIGIPA DUK-A-SEL SOKANI} = \frac{\text{GIMAANI} \times \text{A-SELO GA-AKNA ALTUANI}}{\text{CHU-SOKATNA AMANI}}$$

Crunch Diagram



Ia nanggrimaniko equation gita sena man-a

$$\text{KENBEGNIGIPA DUK-A-SEL SOKANI} = \text{GIMAANI} + \text{A-SELO GA-AKNA ALTUANI}$$

1.10 DISASTER MANAGEMENT:

- Ian duk-a-sel aro ma-sisogija rang-gitik sokgipa obostarangko komiatna ba namatna dingtang dingtang kam ka-anirang ong-a aroban a-selo ga-akna kenchakna nanggipa manderangna duk-a-sel sokanioni chel-chakaniko ba nampilaona ra-bapilaniko dakaninaba pangchakaniko on-a.
- Duk-a-sel sokanina kam ka-anirangara duk-a-sel sokmitingo aro uni ja-mano daksona nanggipa kamni gadangrang gnang aroban tarisamsyani, a-sel sokaniko komiatna kam ka-ani, rang-san kam ka-ani aro nampilaona ra-baanikoba man-chapa.

1.11 DISASTER MANAGEMENT: GADANGRANG ARO ONG-TAITAIGIPA OBOSTARANG

Duk-a-sel sokanina kam ka-anirangna ong-taitaigipa obostarango ka-mao on-gipa apalbegipa gadangrang gnang:

- Duk-a-sel ong-a obosta: Ian ong-chongmotenggipa gimaani aro a-sel aro kenbegnigipa obosta sokani somoiko miksonga. Iano nosto ong-aniara ong-a obostani ru-utani somoi baksana apan melia.
- Rang-san Kam Ka-ani aro Dakchakaniko On-ani: Ian a-sel obosta sokani ja-mano skanggipa gadangko miksonga. Dakchakaniko on-ani bosturang jekai cha-anirang, chola-ba-ra, samrang aro gipin dakchakgnigipa bosturangko so-sojengjeng ong-e dongaoni tom-tomaona ra-bapilna gita suala.
- Gadang aro Cholko On-pilani: Iano so-sojengjeng ong-aoniko chu-gimik nampilaona aro tom-tomaniona ra-bapilna gita dikdiksana manderangni jakkalna man-gipa biaprang aro nokrangko riksamsoanikoba man-chapa.

- Rikpiltaiani: Songsalni manderangko tom-tomgipa janggitangaona rimbapilani. Songsalni manderangko tom-tomgipa janggitangaona rimbapilna a-selo-obostao ga-akgipa biapko rikpiltaiani. Mongsongbate songsalni manderangko duk-a-sel sokna skang uamangni janggitangenga gitan apsane ba una nambata gadangona donatpilna nanga. Jekai: dikdiksana dongchakna rikgipa nok; on-anirang (grants); sana bananiko on-ani.
- Namroro-silroroani: Duk-a-sel sokani ja-mano rikpiltaianiara namroro-silroroani programme-rangko a-bachengatna gita namgipa cholrangko on-a. Namroro-silroroani programme-rangko duk-a-sel sokanio mangrake aro pangkame dongna man-a gita tarina nanga.
- Champengani: Champengani ian be-en-ko, namroro-silroroaniko aro songsalko gimaaoni aro kengnigipa a-selrangona altue ga-akonaniko komiatna aro uandakgipa obostarangoniko naljokaniko on-aniko miksongani ong-a.
- Komiatna Kam Ka-ani: Komiatna kam ka-ani ian duk-a-sel sokani bakroanganiko ba sokbana am-gipa duk-a-selko komiatna kam ka-aniko miksongani ong-a. Komiatna kam ka-ani duk-a-sel sokna skang, ong-miting somoio ba matchotman-ani ja-mano ong-naba gnan, indiba iani miksonganiko sokbaenggipa duk-a-selna kam ka-soanirangna jakkalbata. Komiatna kam ka-ani gadangrango chi bana re-anina champengsoanirang ba buildingrangko mangrakatsoanirang, disaster management-ni bidingo training, a-a jakkalaniko nirokani aro jinmana skie on-ani aro uandakgiparangko man-chapa.
- Tarisamsoani: Tarisamsoani kamrangko duk-a-sel sokgnina daksoa aro iano sorkarirang, songsalni manderangko duk-a-sel sokanina ta-rake kam ka-na aro champengsoani kamrangko daksona dakchaka. Iano rang-gitik dakna-ka-na nanggiparangko tarisamsoanirangko dakna, mikrakatsoanirangko dakanirangko namdatani, kam ong-gipa chimonge donsogiminrangko nirokani, kam ka-giparangna skie on-ani, sandiani aro jokatani gadangrang unbaksana a-sel obosta soktaina chol gnanngipa biaprangoniko manderangko naljokgipa biapona rimjitna tarisamsoanirangko daksoanikoba man-chapa.

The Disaster Management Cycle



BAK II:

DISASTER MANAGEMENT-O ME-A-ME-CHIKNI APSAN CHANCHIANIKO NANGANI

2.1 DISASTER MANAGEMENT-NA ME-A-ME-CHIKNI RE-MIKKANGANI

Duk-a-sel sokanina tarisamsoani aro rang-gitik kam ka-ani programme-rangko tarianio me-asarangni aro me-chikrangni a-sel sokanio dingtang dingtang obostao ga-akaniko aroban uamangni ia a-selrangoni dingtang dake naljokani cholrangko dakani bidingo ma-sina gita me-a-me-chikni apsana chanchiani aro re-mikkanganiko nanga.

Me-a-me-chikni nanggrimanichin duk-a-sel sokanio manderangni chanchichipsoani bil, tarisamsoani bil, naljokaniko dakani aro nampilaona sokani cholko baridapata. (Valdes, H. M., 2002). Unigimin, me-a-me-chikni nanggrimanio bakrangko mesokanichi, duk-a-selo ga-akna altuanirangko aro miksonggipa ja-ku de-anirangko namroro-silroroaniona ra-angani ramarangko ma-sina gita dakchaka.

2.2 ME-A-ME-CHIKNI BIDINGO U-INGGIPA DISASTER MANAGEMENT-NI PANGCHAKANIRANG

Me-a-me-chikni bidingo u-ininggipa disaster management ia pangchakani japangrango ong-na nanga:

ME-CHIKRANGNI MAN-GNIRANGARA MANDENI MAN-GNIRANGAN ONG-A, unigimin dakchakanirangko on-anio nangani kriosan pangchakenba ong-na nangaija indiba me-chikrangni man-gnigipa bilrangko on-a aro uarangna chel-chakanikoba on-jolna nanga.

- Me-asa aro me-chikko APSAN ONG-E CHANANI
- Me-chikrangko DINGTANGE RA-GIJANI

2.3 DISASTER MANAGEMENT-O ME-A-ME-CHIKNI BIDINGO CHE-EM CHE-EM NIANIKO DAKANINI GAMCHATANIRANG

Disaster Management-o me-a-me-chikni bidingo che-em che-em nianiko dakaniara iarangko man-a dakchaka:

- A-sel-obosta sokani somoio me-a-me-chikni nanggrimanio dingtanggrikanirang aro apsana ong-anirangko ma-sina dakchaka.
- Nambata dingtanganiko ra-bana man-aniko mesoka.
- Duk-a-selo ga-akgipa manderangna dikdiksana dakchakaniko on-enggipa cholrangko uamangni mikangchina namroro-silroroaniona sokatjolna gita nanggrimatniko daka.
- Dakchakaniko man-enggipa dolrangni mangrakani aro dakna-ka-na am-aniko ma-sia.
- Dakchakaniko on-anirangni, manderangni chanchisamsoani, kam ka-na man-ani aro an-tangtangna choliani bilrangko komiataoni choljokaniko on-a.

2.4 DUK-A-SEL SOKANIRANG ME-A-ME-CHIKNI DINGTANGGRIKANO NANGTINGGRIKANI

Me-asa me-chikrangni salantio dingtang dingtang daka kamrangni a-selo me-a-me-chikni dingtanggrikaniona aro duk-a-selni somoirango nangtinggrikaniona soka.

- Dakrongbaenga-ja-rikrongbaenga gita kam ka-anio me-asarang aro me-chikrangko meligija سوالاني a-selo me-chikrang duk-a-sel sokani somoirango bang-bate bil on-e kam ka-dapna nanga aro sinjetaniko man-dapa.
- Jensalo me-asa sia ba saknaa man-a ba kam sandina gita gipin biaprangchi re-jitangachim, unode me-chikrangsa nokdangko aro bi-sarangna, saenggipa manderangna aro budepa-butchumarangna niroksogiparang aro duk-a-sel sokanirango chel-chakani aro naljokani cholrangko daksogiparang ong-a.
- Duk-a-sel sokani somoio, janggitanganio neng-nikanirang pilaknan apsanaioba, me-chikrangna gnanggipa cholrang komibata. Ian indake ong-a je, me-asarangara gipin biapchi re-jitangenba taripiltaiiani-rikpiltaiiani kamrango an-tangtangko choliatna man-a, indiba me-chikrangde nokdangni manderangmung dongrikaia.
- Duk-a-sel sokani somoio, me-asa me-chikrang apsan ong-e gisikni gita dukrangko man-genchim ong-oba, me-chikrangna nokdangni manderangna kenchakani gnanganichi duko ga-akbata. Duk-a-sel sokanichi nokdango gimaani aro songsalo ong-a obostarangni a-selo me-chikrangna gisiko dukni aro so-sojengjeng ong-anirangko baridapata.
- Me-a-me-chik ong-ani bidingo simsake ra-gijagipa dakchakaniko on-anirang aro refugee camp-rangni a-selo bang-bata changon me-chikrangni kosako ong-gija kam ka-anirang aro ong-gija jakkalanirang baridapaha (dingtang kuturirang dongja, chel-chakani dongja) aroban me-chikrangni sinjetani aro gisiko duk aro so-sojengjeng ong-anirangko baridapata (relief camp-o nokdangni manderangna on-a neng-nikani, chi jokgipa ba chi gnanggipa biaprangni chel-ani, me-a-me-chikrangna dingtangmancha on-gipa rongtal-antalani cholrang donggijani).
- Duk-a-sel sokanichi tangka paisarangko nangani a-selo bang-bata changon me-chikrangko an-tangtango donggipa gamchatgipa bosturang aro sona-ruparangko palna gita draatako man-a.
- Duk-a-sel sokani a-selo me-chikrangko me-asarango pangchakna nanganiko bariata aro indaken uamangko ong-gija daka kamrango sokatna altubatata (me-chikrangko gipin biaprangona badingnaba gnang ba an-tangtangni be-en-ko palna gita draako man-aba gnang; dambe me-chik bi-sarangko jikgri ong-e dongenggipa me-aparangna bia ka-atako man-a gnang) aro noko ong-gija jakkalako man-a (duk-a-sel sokmanani ja-mano me-asarangna sokgipa gisiko so-sojengjeng ong-anirang bang-bata changon uamangko nokdango hala ka-aniona sokatronga)

2.5 MAINA ME-CHIK/ME-CHIKMARANGARA DUK-A-SEL SOKANIO SAKNAANIKO MAN-A ALTUBEA?

Duk-a-sel sokanio me-asa aro me-chikrang dingtang dingtang bakrango aro gadangrango saknaaniko aro dukniko man-omangba, me-asarang aro me-chikrangni dingtang dingtang cholrangko ra-anio aro nokdango aro songsalo bil man-anio dingtanggrikanio a-selo me-chikrang saknaaniko aro duk-a-selo ga-akna altubata.

- Me-chikrang bang-a cholrangkon man-rongja, jekai songsalo bil man-ani, re-a-doani, u-iani,

changa sapani (unbaksana poraia-skiani), a-ani aro gipin tangka-paisa man-ani cholrangni kosako nokgipa ong-ani ba bil man-ani, an-tangari re-a-doani, nokko aro janggitanganina kam ka-na man-ani, re-mikkanganina ba dakna-ka-na chanchianio an-tangni nangnikaniko aganpana bil man-paani, saknaa man-aoni chel-chakani.

- Me-chikrangko ge-a-gamani cholko dakaoba, janggitangani cholrangko ra-aoba gamchate ra-brerongja aroban komie ong-e hajirarangko ba dormaharangko on-a aro unbaksanaba an-seng-baljokani cholrangko ra-anio ba dolrango dongpaanio mamung man-dapanirang dongja. Ge-a gamani aro gipin cholni bakrangan duk-a-sel sokanio nangchakerongbata, aro indaken a-sel obosta sokani ja-mano janggitangani cholrangko am-giparangoni me-chikrangko bang-bate nikna gita man-rongbata.
- Me-chikrangara nokdangko aro nokni bi-sarangko aro budepa-butchumako nirokna nangani gimin, duk-a-sel sokani ja-mano uamang jakgitele a-palchi ba gipin biapchina ong-kate kam sandina gita man-ja.
- Me-asarang bang-bata changon gipin biaprangchi ong-katrongenba me-chikrangko nokko chalairikna donangronga. Ia ong-manchagipa obostako aro me-chikrangni namroro-silroroanio aro bi-sa man-anirango neng-nikanirangko chagronganirangko ma-sina neng-nikani a-selo me-chikrangni songsalo bakrangko ra-paanirang bilongen komia, aro uamangna nanganirangko on-anirang chu-ongrongja.
- Nokrang bang-bata changon duk-a-sel sokanichi nosto ong-ani gimin, bang-a nokdangrangkon dongchakna gita, jeon salanti nanggipa cholrangko man-a neng-a jekai song-a-ritani cholrang chu-onga gita dongja, ua biaprangona jitna gita draatako man-a aro indake ong-anichin me-chikrangna neng-nikanirangko aro tangka-paisa nanganiko baridapatenba uamangko jakgitele dongaoniko chel-ata aro gipin janggitangani cholrangko sandina re-anikoba champenga.
- Jensalo me-chikrangni tangka-paisa jakkalaniko ra-seke katjokode; uamangni nokko chalaiani aro choliatani gadangoba nangchakea.
- Me-chikrangchi chalaigipa nokdangrang bang-oroahani gimin aro duk-a-sel sokani ja-mano dongchakna rikgipa nokrango dongna re-bagipa bang-bataan me-chikrang ong-ani gimin, noko me-chikrangni kosako ong-gija kam ka-ani aro uamangna be-enni gita aro gisikni gita saknaa man-anirang baririkrikaniko nikna gita man-a.
- Me-chikrangni namroro-silroroanio aro an-seng-baljokaniko da-ororo duk-a-sel sokanina dakchakaniko on-anio mongsonggipa ong-e ra-na a-bachengjokkoba, uamangna nirok-simsakanirangko on-ani chu-ongsrangkuja aro iani a-selon uamang an-seng-baljoke dongna man-rongja.

2.6 DUK-A-SEL SOKANI SOMOIO ME-CHIK/ME-CHIKMARANGNA CHOLNI KELKIRANG

Gelna man-telgijagiba duk-a-selrang sokani somoio me-chikrangna bang-bate obosta nangchakeaniko nikna man-oba, ian chu-gimik ong-manchagipa obostani adha-san ong-aia. Gelna man-gija ong-telaigipa duk-a-sel sokani somoirang me-chikrangna dingtangmancha me-a-me-chikko dingtange ra-gipa songsalko dingtangatna gita cholrangko on-a:

- Duk-a-sel sokani somoirango me-chikrang an-tangtangni gamchatani aro nangchongmotaniko mesokman-aha. 1998 bilsio Mitch minggipa tarakgipa balminduri sokani ja-mano, Guatemala

aro Honduras-ni me-chikrangni an-tangtang nokrangko rikaniko, chia-kol aro nalarangko cho-aniko, chi ko-e rikaaniko aro dongchakani nokrangko rikaniko nikna gita man-a.

- Me-asarangni nangnikani kosako me-chikrang pangnan me-asarangni ka-gipa kamrangko chu-gimik bak ra-e ka-na gita gisik skani aro dakna-kana man-aniko parakronga. Iachin me-chikrangni dakna-ka-na man-ani bilni bidingo songsalo chanchiani aro bebe ra-aniko dingtangatna man-gen.
- Me-chikrang songsalni manderangko duk-a-sel sokanirango rang-san kam ka-na gita didianiko on-a man-a. Uamang dolrangko bikote aro songsalo dingtang dingtang kam ka-giparang baksa bakrimenba songsalna nangchongmotgipa nanganirango chu-sokatna aro man-atna gita kamrangko ka-a. Iandakgipa songsalo bakrimaniko ra-baanichi duk-a-sel sokanirangna tarisamsoanirango nangchongmotgipa ong-a.

BAK III

A-SEL OBOSTA SOKANIO DAKCHAKANIKO ON-ANI SOMOIMITINGO RANG-SAN KAM KA-ANIRANGNA ME-A-ME-CHIKNI BIDINGO U-INGANIKO NANGANI

A-sel obosta sokanio dakchakaniko on-ani somoimiting, dakchakaniko on-enggipa aro dakchakgnigipa bosturangko sualenggipa agency-rang ka-mao on-gipa bakrang gitasa me-a-me-chikni bidingo u-ienba simsak-niroke kamrangko ka-na nanga:

3.1 DAKCHAKANIKO ON-GNIGIPARANGKO SUALANI

- Me-chikrangkodakchakgnigipabosturangkosualgipadolrangobakman-atbo.Chanchisamsoaniko dakani, cha-anirango sualani aro nirokano me-chik dolrangko jatchigipao dona nanga. Duk-a-sel sokani ja-mano bosturangko ra-baani aro sokatanio chel-chakgipa dolrangni komibee bak ra-anirango nanga.
- Me-chikrangona sokna mana gita dingtangmancha rakbate kam ka-na nanga maina bang-bata songsalrangon me-chikrang, sualenggipa dakchakgnigipa bosturangko ra-ena gita mikkangchi re-barongja. Pakistan-o, 2005 bilsini October jao ong-anggipa banggriani ja-mano, bang-bata me-chikrangchi chalaigipa nokdangrangkon bosturangko sualenggipaoni watchangako man-a maina Muslim songsalo me-chikrangkode me-asarang ja-rikchapgijade jinmao nikna gita man-ja.
- Me-chikrangko an-tangtang sualenggipa dakchakgnigipa bosturangko ra-echina didianiko on-a nanga.
- Dakchakgnigipa bosturangko sualenggipa biaprango jinmana jakkalna paikanarang, unbaksana me-chikrangna dingtangmancha jakkalna rikgipa paikanarang, namgipa ringani chi aro salakimo asongchakanirang dongna nanga.
- Dakchakgnigipa bosturangko sualenggipa biaprango me-chikrangna dingtange chadenge sengani cholrangko, mongsongbate ua biaprango jeon me-a-me-chikko dingtange ra-achim, uarangko dakna nanga.

3.2 CHA-ANI-RINGANIRANGKO CHIMONGE DONSOANI

- Manderang jemangan a-sel sokanio dukko ba saknaaniko man-ahachim uamang cha-ani-ringani gri ong-jachina aro be-en-na namgniko ra-bagipa cha-aniko man-jae saaanirango man-jana gita duk-a-sel sokanina dakchakgniko on-gipa bosturangko ong-a bewalo sualna nanga.
- Cha-anirango sakantinan apsan ong-e, mamung donnua gri, darangkoba watchanga gri aro manderangna man ra-a gnangsa sualna nanga.
- Cha-anirango sakanti mandenan, jemangan duk-a-sel sokanio cha-ani-ringani gri ong-a obostaona sokachim uamang pilaknan sualna nanga: nokdangni manderangko gimaatgiparangna mangmangsan ong-aigija, duk-a-sel sokani a-selo janggitangani cholrangko gimaatgiparangnaba sualna nanga.
- Duk-a-selo chagronggipa manderang an-tangtangni skango janggitanga bewalo gita apsan ong-pilkujana kingkingde uamangna chu-onga gita cha-anirango aro ringani chi-rangko sokatna nanga.

- Duk-o ga-akgipa manderangko cha-ani-ringanina dakgrikataona ba uamangko bi-amgiparang gita obostaona sokatgija, cha-ani-ringanirangko soalani gadangrango manderangni man-ko rakkiesa aro mande ra-a gnangsa ong-a bewalo soalna nanga.
- Me-asarang sualgipa cha-anirangko ra-soe ua cha-anirangko palenba man-gimin tangkarangchi chu-rangko brena man-jana gita me-chikrangsa cha-anirangko ra-sogipa ong-na nanga.
- Okgnanggipa me-chikrang, batgitchak bi-sako nirokenggipa ma-giparang, budepa-butchumarang, ma-gri pagri ong-gipa bi-sarang aro be-en-ni gita bilgrianiko man-giparangna, uamang an-tangna cholrangko man-kujana kingkingde cha-ani-ringaniko dakchakani gita on-a nanga.
- Sualenggipa cha-ani-ringani namgipa gadangni ong-na nanga aro manderangna uarangko cha-anio mamung kenchakani gri ong-gipa ong-na nanga.
- Jatni aro songsalo dongenggipa dingtang dingtang jatni manderangni cha-bewalko nirokesa cha-anirangko dingtangmancha soalna nanga.
- Soalna a-menggipa cha-anirangni bidingo me-chikrango dingtangmancha uamangni aganku-pattianiko ra-na nanga.
- Duk-a-selo ga-akgipa manderangna uamangni be-en-na mangraknigipa cha-anirangko man-atna gita sualenggipa cha-anirango mi, misi, gom aro dal, ka-rek, motor dakgiparangkoba on-chapna nanga.
- Duk-a-sel sokanichi gisikrango so-sojengjeng ong-ani a-selo bi-sana sok kanenggipa ma-giparangni sok-o chu-onga gita dud-ko ong-katatna man-jani gimin, nokdangrang jerangon bakgitchakrang dongachim, uarangna cha-anirangko soalania dud-rangkoba on-chapna nanga.

3.3 ME-CHIK/ME-CHIKMARANGNI DINGTANGMANCHA NANGGNIRANGKO MAN-ATANI

Maimai dakgipa dakchaknigipa bosturangko soalgen uarangko chanchimiting, dakchakaniko on-gipa agency-rang me-chikrang baksa agangrike uamangni agan-ku-pattianikoba ra-na nanga maina me-chikrang an-tangtangni nanggnirangni aro nokdangni manderangni nanggnirangni bidingo name ma-sibata. Mittam me-chikrangni nangchongmotgipa bosturangara:

- Ringani chi
- Be-en-na namgniko ra-bagipa cha-anirang
- Bi-sarangna cha-ani aro bakgitchakna dud
- Be-en-na mangraknigiko ra-bagipa on-chapgipa cha-anirang (multi vitamins, iron)
- Bi-sarangni bosturang jekai diapers, gombolrang aro chola-ba-rarang
- Tusimiting nanggipa bosturang (tosokrang, tuchakna andapani ba-rarang, gombolrang, kodam/balisrang)
- Jatni ba dol baksa ma-eke ma-rape ganani ba-ra-cholarang (dakbewalni ba jatni kri gangipa ba-ra-cholarang jekai sarong-rang, sko wengipa kotiprang, salwar kameez-rang, saree-rang)
- Ning-o ganani ba-ra (underwear) aro petticoat-rang
- Ding-gipa ganani ba-ra-chola

- Bi-sarangni gangipa chola-ba-ra
- Paikana aro auo jakkalgipa bosturang: toilet rolls, sabon-rang, shampoo
- Towel-rang
- Sanitary pads/towel-rang aro rongtalgipa ba-ra gipok maina mittam jatrangde karkanarango tarigimin disposable pads-rangko jakkalrongja
- Contraceptives, mosori
- Ganggu katatani ba siatani samrang
- Chosma-rang, nachil knana dakchakgiparang, su-dike rama re-ani goldikrang

3.4 ME-CHIK/ME-CHIKMARANGNI JAANTI BEWAL NIKANIO NANGGNIRANGKO MAN-ATANI

Duk-a-sel sokani ja-mano me-chikrangni jaantio bewal nikanio neng-nikanirang aro nanggnirangko rang-san nirokna nanga. Sanitary napkin-rang aro underwear-rangko soalmiting me-chikrangko kratchaanioni aro chonikka man-aoni naljokaniko on-a gita dakchakaniko on-ani gadangrango aro kam ka-anirango me-a-me-chikni bidingo u-igipa ong-na nanga. Me-chikrang an-tangtangni rongtal-an-talanina measarangko mikkangpana pa-rongjani gimin, iarangko simsakna nanga:

- Sanitary napkin-rang aro underwear-rangko soalania me-asarangko bak NANGATNA NANGJA.
- Sanitary napkin-rang aro underwear-rangko soalania me-chikrangko bak NANGATNA NANGA.
- Jaanti bewal nikenggipa me-chikrangna chu-onga gita ba-rarang aro su-srangani/su-galani cholrangko on-a nanga.

3.5 DIKDIKSA SOMOINA DONGCHAKANI NOKRANGKO TARISAMSOANI

- Duk-a-sel sokna skang manderango an-tangtangna dongchakani nok donga ba donggijaniko nigija, sakantinan jemangan dongchakna nokko nangachim uamangna dongchakani nokko man-atna dakchakaniko on-a nanga. Jekai, Thailand-o, janggi jokrikgiparang jemangan tsunami sokna skang nokni nokgipa ong-ani sakkiko on-a man-jachim, uamangna dikdiksa somoina dongchakna rikgipa nokrangko dongna on-ja.
- Dikdiksa somoina dongchakna rikgipa nokrangko uno dongchakenggipa sakantinan an-tangtangna somoi aro biap ra-na man-a gita rikna nanga.
- Pilak nokdangrangnan, nokdang dal-anio pangchake, dingtange biapko dona nanga.
- Jikse ra-grikgimin aro bi-sarangna dingtang kuturi dongna nanga.
- Me-chikrangna ba-ra-chola gansrena kuturirang aro bi-sarangna sok kanchakna kuturingrangkoba tarina nanga.
- Manderangna uamangna an-tangtangni gisepriko dingtangmancha somoiko on-grikna man-a gita tent-rangko aro dikdiksa somoina dongchakna rikgipa nokrangko sambagrike ba nangchape rikna nangja.
- Obostako nirokesa dongchakani nokrangko rikna nanga. Nokrangko a-bri-rango jeon a-a

ru-rongna altuachim aro a-kawe dakarango jeon wachi kario chi bana re-na altuachim, uarango rikna nangja.

- Me-chikrangna ka-donganiko aro chel-chakaniko on-a man-a gita tent-rangko mangrake tarina aro kana nanga.
- Segrirangna, me-chikchi chalaigipa nokdangrangna, me-asachi chalaigipa nokdangrang jemangni nokdango budepa-butsuma aro be-en-ni aro gisikni gita bilgrianiko man-giparang dongachim uamangko mongsongbatgipa nirokna aro sokna nangchenggipa ine ra-enba nokprakprakchi re-e, tent-rangko sualna nanga.
- Dikdiksana rikgipa nokrang aro tent-rang dongtogipa aro dongna kragipa ong-na nanga. Duk-a-sel sokani somoirango, me-asarangna bate me-chikrang an-tangtangni bi-sarangko nirokenba dongchakna rikgipa nokrang somoiko re-atbata. Gitcam bewalo tarigipa tent-rang jerangni samtangtangan gitcingenba jitna aro re-na gita biaprang ap-changketachim, uarango namdapate tarina nanga. Tent-rangko balwa jokna man-eba tarina nanga. Tent-rangni ning-ao balwa ka-sinatani aro ding-atani cholrangkoba man-atna taridapna nanga maina tent-rangni ning-ao sin-karirango bilongen sin-data aro ding-karirango bilongen ding-data.

3.6 PAIKANA ARO AUCHAKANI BIAPRANGKO TARISAMSOANI

Rongtal-an-talani cholrangko chu-onga gita nangchongmota maina uarang donggijanichi me-chikrangni bi-sa ba-ani aro uamangni an-seng-baljoke donganiko champenga.

- Me-chikrangna auna aro an-tangtangko rongtale rakkina gita uamangna chu-onga gita salantion rongtalgipa chi-rangko sokatna nanga. Salantio nokdangprako sakprak mandenan ringna, mi bijak songna aro an-tangtangko rongtale rakkina gita komibeoba litre 15 mang chi-ko nanga.
- Sepangbatgipa chi jokgipa ba chi man-gipa biapona je nokkonaba batbeoba 500 meter mangsan chel-grikna nanga.
- Chi jokgipa ba chi man-gipa biaprangko, chi man-ani komijana gita somoi gita rongtalatna aro simsak-nirokkringna nanga.
- Me-chikrangna paikanarangko dingtang rike on-a nanga.
- Paikanarang aro auchakram kuturirango pakmarang aro tekna man-gipa do-garang aro chi jokangna nalarangba dongna nanga. Me-chikrang paikanarangko mamung kena grian jakkalna man-a gita uarango bangbang ong-gija chu-gimik chipgripna man-e rikna nanga.
- Auchakram aro paikanarangni pakmarangko ba nokkingrangko a-kol pue nauaniko champengna gita uarango mangrakgipa bosturangchi rikna nanga.
- Paikana damsako batbeoba sak 20 manderangan jakkalna nangaia. Tampi aro ganggu-rangoni batrikrikgipa sabisirangko komiatna gita camp-ko simsak-nirokenggipa aro uno dongchakenggipa manderang paikanarangko rongtale rakkiani cholrangko ra-gatna nanga.
- Jabolrangko nama bewalo galanikoba tarisamsona nanga.
- Camp-rangni ning-ao, paikanarang aro auchakram biaprangko dongchakenggipa nokrangoni chel-e rikna nangja (50 meters) and me-chikrangna chel-chakaniko on-a gita bijolirangko sringe teng-ate dona nanga.
- Me-chikrangna chel-chakaniko on-a gita paikanarang aro auchakram biapona re-gipa ramarangko

teng-ate dona nanga.

- Ning-o gangipa ba-ra-rang aro an-tangtangko rongtale rakkina jakkalgipa ba-ra-rangko su-galna aro salo rame ran-atna man-a gita dingtangmancha biaprangba dongna nanga.
- Me-chikrangna ba-ra-chola gansrena kuturirango aro bi-sarangna sokkanchakna kuturingrangkoba tarina nanga.

3.7 AN-SENG BALJOKANINA ON-GNIGIPA CHOLRANGKO SANDIE DONSAMSOANI

An-seng-baljokanina on-gipa cholrangko man-ani bil-ara Universal Declaration of Human Rights, 1948-ni Article 25-o ku-rachakgimin fundamental human right ong-a.

- An-seng-baljokani cholrangko, uamangni gadangko, atchichakram biapko, gipin biapona re-jitbaaniko, an-tangtangni bimungko segatani biapko, medical insurance-ko nigrikgijaan, pilak duk-a-selo ga-akgipa manderangna on-a nanga.
- Okngangenggipa me-chikrang aro bi-sa gnanggipa me-chikrangko sandie-ma-sie ra-enba uamangna indinari tangka gamna nanggija bi-sa man-manani ja-mano simsak-nirokaniko aro dingtangmancha be-en-na mangrakngigipa cha-anirangko on-a nanga.
- Okngangenggipa aro bi-sana sok kanenggipa ma-giparangna chu-onga gita nanggipa vitamins-ko aro on-chapgipa cha-anirangko on-a nanga.
- Bi-sa man-ani somoirangna namgipa rongtalgipa aro chel-chakani gnanggipa biap aro cholrangko tarisona nanga.
- Ma-gipa aro bi-sarangni an-seng-baljokanio neng-nikanirangko chagronganina simsak-nirokna gita me-chik obstetrician aro gynaecologist-rang dongna nanga.
- Me-chikrang jemangan duk-a-sel sokani ja-mano bi-sa man-achim uamangna aro bi-sarangna dingtangmancha simsak-nirokaniko aro aganku-pattianiko on-a nanga maina uamang duk-a-sel sokani somoio bilongen gisiko so-sojengjeng ong-aniko man-a altubea.
- Ua ma-giparangna, jemangni sok chakuenggipa bi-sarang duk-a-sel sokani a-selo janggi gimaahachim aro jemangni sokni dud tin-kaachim, uamangna dingtangmancha sana-banani cholrangko on-a nanga.
- Dingtang dingtang rokkomni bi-sa ba-atgijani samrangko (contraceptives) man-a dipetde seng-gnangan chu-onga gita donsamsona nanga aro uarango neng-nika grian man-atna kam ka-na nanga.
- An-seng-baljokani cholrangko on-giparang somoi gita camp, dongchakenggipa nok aro duk-a-selo ga-akgipa manderangchi re-e an-seng-baljokani cholrangko on-a nanga.
- An-seng-baljokani cholrangko on-a kam kaenggipa me-chikrangko an-seng-baljokaniko on-gipa dolrang jemangan camp-rangko aro duk-a-selo ga-akgipa manderangko simsak-nirokengachim, uamang baksa bak man-chapatna nanga.
- Bi-sarangko, bi-samitingo man-gipa sabisirangoni chel-chakaniko on-a gita uamangko somoi gita tikkarangko su-na nanga.
- Me-chikrangna jinmana on-gipa sana-bananiko cholrangko neng-nikani grian man-atani.
- Hospitalo sanenggipa me-chikrang hospital-oni ong-katjokkon uamangna dongchakani nokko

on-a nanga aro uamang darang biapchiba re-na-dona dongjagenchimode hospital-oni re-ongkatna on-a nangja. Duk-a-sel sokani a-selo uamangoni mittamde be-en aro gisikni gita bilgrianikoba man-ronga.

3.8 ME-CHIK/ME-CHIKMARANG ARO BI-SARANGNA CHEL-CHAKANI ARO NALJOKANIKO ON-ANI

Duk-a-sel sokani somoio me-chikrangni kosako ong-gija kam ka-anirang batrikrika. Indiba, indakgipa kamrangni bidingo songsalo kratchana aro changala man-a kenenba, ia obostarangko agangija aro gipatgija jripjrip donrongaia. Chu ringani aro pekgipa samrangko jakkalanirang bang-roroanichi camp-rango me-chikrangni kosako ong-gija kam ka-anirangba bariroroa.

- Songsalo Vigilance Committee-rangko a-bachengatenba uno me-chikrangko monitoring officer-rang dake donatna nanga jedakode uamang me-chikrangna chu-gimik chel-chakani aro naljokani kamrangko ka-na man-gen.
- Me-chikrang aro bi-sarangni kosako ong-gija kamrangni aro soktelgnigipa a-sel obostarangni gelna aro champengna man-a gita ia committee-rang seachi aro ku-sik aganachiba chel-chakanina nangngigipa ja-rikani niamrangko tarina nanga.
- Ia camp-rango ong-gija kamrangko ka-ani bidingo rang-san kamrangko ka-na man-a gita me-chikrangna skie on-aniko dakna nanga.
- Me-chik pulis officer-rang, aro obostani kri nanggenchim ong-ode, chel-chakgipa dolrang-o (armed forces) kam ka-gipa me-chikrang camp-rango chel-chakani aro simsak-nirokaniko dakna nanga.
- Me-chik pulis officer-rang camp-on dongna nang-gen aro camp-rango me-chikrangni uamangni kosako maiba ong-gija kamrang ka-aniko agananirangko serike ra-enba uni bidingo nirok-sandianiko dakna nang-gen aroban me-chikrangni kosako ong-gija kam ka-anirangkoba nirokna nang-gen.
- Camp-rangko walo nitimgiparangba dongna nang-gen.
- Me-chikrangni dakchakaniko am-anio dakchakna man-a gita security guard-rangko (me-asa aro me-chik) me-chikrangni chagronggipa obostarang aro uarangoni chel-chakaniko on-a nangani bidingo skie on-a nanga.
- Me-chik aro me-chik bi-sarangko ong-gija kamko ka-atna, badingna aro uamangni be-en-ni bakrangko rat-e ote palna rimsruke ra-aoniko champengna gita camp-rango aro songsalo chel-chakani cholrangko dakdapna nanga.
- Ong-gija kamrangko ka-a man-gipa aro saknaa man-gipa me-chikrangna aganku-pattianiko on-gipa cholrangko neng-nikani grian man-atna nanga.
- Ong-gija kamrangko ka-aoni aro saknaa man-aoni naljokaniko man-gipa me-chikrangna niamni gita cholrangko on-gipako tangka paisa gama grian on-a nanga.
- Ong-gija kamrangko ka-a man-gipa aro saknaa man-gipa me-chikrang aro ua daka-ka-a kamrangko nikiparangna uamangni kosako a-jak sokpilaoniko champengna gita chu-gimik chel-chakaniko on-a nanga.
- Ong-gija kam ka-a man-aniko u-iatani ja-manon be-en-ko porikka ra-e nianirangko (medical examinations) on-a nanga.

- Me-chikrangni kosako ong-gija kam ka-anirangko u-iatani aro aganani cholrangko on-a nanga.
- Me-chikrangna uamangni be-en-ni gita, gisikni gita saknaa man-aoni jakgitele dongna man-ani bil donga ine uamangna u-iatna nanga.
- Saknaa man-ao dakchakgnigipa gnanggipa naljokaniko on-gipa cholrangni bidingo me-chikrangna u-iatna nanga (jekai, kachari, pulis-na u-iatani, sana-banani, aganku-pattianiko on-ani, dakchakaniko on-gipa dolrang).
- Be-en-ni gita aro gisikni gita saknaaniko man-gipa me-chikrangna gisikni gita aro gipin dakchakanirangko on-a gita camp-rango me-chikrangni Self Help Group-rangko a-bachengatna man-gen.
- Me-chikrangni kosako ong-gija kam ka-anirangna nanga ja-ku de-aniko dakna gita Nirokgipa Dolrangko (Vigilant Groups) a-bachengatna nanga.
- Pulis, sorkarini ning-ao kam ka-giparang aro sorkarini ning-ao kam ka-gijagiparang me-chikrangni kosako ong-gija kam ka-anirangko mongsonggipa ong-e ra-na nanga aro me-chikrangna iarangoni dakchakaniko on-a nanga.
- Camp-rangni sambao chu-rangko palna on-a nangja.
- Camp-oni gipin biaprangona jekai skulrang, bus neng-takchakram biaprang, bajar-rang aro dokanrango bijoli dongna nanga aro uarangona re-a-doani cholrangba dongna nanga.
- Sorkariko chalaina kamni ja-pangko tarigiparang uamangni ja-ku de-anirangchi nangchakegiparangni bidingo name nichengna nanggen jekai sterilized ka-gimin me-chikrangna re-canalization surgery ka-na aro bia ka-daldal jikserangna tangka-paisani gita dakchakaniko on-ani. Indakgipa kamko chalaiani japangrangchin me-chikrangni kosako dingtang dakgipa rokkomo saknaa on-anirangona sokanga: drae sterilized ka-ani aro India-o ta-rakbegipa balminduri (tsunami) sokani ja-mano “tsunami” bia ka-anirang.

3.9 GISIKNI GITA AGANKU-PATTIANIKO ON-ANI CHOLRANGKO TARISAMSOANI

- Gisiko so-sojengjeng ong-anirangna me-chikrangna aro bi-sarangna, segrirangna, budepa-butchumarangna aro be-en-ni gita bilgrianiko man-gipa me-chikrangna aganku-pattianirangko on-a nanga.
- Me-chik counselor-rang aganku-pattianirangko on-a gita dongna nanga. Gisikni gita aganku-pattianirangko on-ani cholrangko camp-rang aro dongchakna rikgipa nokrangko a-bachengatna nanga.
- Gisikni gita simsak-nirokaniko on-anio gisiko so-sojengjeng ong-anirangko namatainasan dakna nangaija, indiba gisikona rang-san dukni sokaniko aro be-en-o saknaa man-aniko namatpilna gitaba dakchakaniko on-a nanga.
- An-tangtangna ka-dongan aro dakchakaniko on-grikna man-a gita saknaa ba duko ga-akgipa me-chikrang Self Help Group-rangko bikotna nanga. Me-chikrang an-tangtangskana dakchakaniko aro ka-donganiko on-grikgenchim ong-ode, ru-uta somoirangode duk aro saknaa man-aoni nampilna ama.
- Sigimin mandeni manggisiko ba gimaenggipa nokdangni manderangko sandina/ma-sina man-a gita gisikni gita aganku-pattiani aro dakchakanirangko on-a nanga.

BAK IV:

DUK-A-SEL SOKANI JA-MAN NAMPILAONA RA-BAANI SOMOIMITINGO RE-BAENGGIPA ANTIRANGO ARO JARANGO KAMRANGKO KA-ANI-DAKANI

Me-chikrangni nanggnirangko man-atna gita camp-rangko aro dongchakna rikgipa nokrangko nirok-simsakani aro chalaianio me-chikrangni bak ra-aniko nangchongmota. Me-chikrangni kurangrangko aro aganpaanirangko jensalo knachakjaha, unon me-chikrangna dingtang paikanarang aro auchakram biaprang dongja jechin uamangni kosako ong-gija kam ka-anirang aro saknaa man-ataniona soka aroban babilsirang dongjani a-selo me-chikrangko noktop dake rikgipa biaprango song-na draatako man-a jechin wa-al kamaniona sokronga.

4.1 CAMP-RANGKO ARO DIKDIKSA SOMOINA DONGCHAKNA RIKGIPA NOKRANGKO NIROKANI

- Camp-o chanchianirango me-chikrangko bak ra-china didianiko on-a nanga.
- Camp-rangko aro dongchakani nokrangko rikna gita tariani aro chanchianio me-chikrangni aganku-pattianirango ra-na nanga.
- Me-chikrangni camp-ko nirokano nokdangni me-asarang dongpana nanga.
- Camp-ko nirokani bidingo tom-bimonganirango ong-atano, me-chikrang dongpana aro bak ra-pana man-a gita somoi meliako tik ka-na nanga (jekai, waltingo ba walorango ong-atna nangja).
- Me-chikrang songo tom-bimonganirangona, dongchana rikgipa nokrangona ba tent-rangona re-bajagenchimode, uamang sakprakprakonan re-enba uamangni chanchipaani aro aganpaaniko ra-na nanga.
- Dakchakgnigipa bosturangko sualanio meligrikgijanirang aro miknenganirang ong-kataniko namgrikatna man-a gita namgrikatpilani aro meligrikatpilaniko dakani chol aro gadangrangko camp-rango dona nanga.

4.2 NOSTO ONG-ANI BA GIMAANINA TANGKA ON-SKAANIRANG ARO NAMPILAONA RA-BAANI CHOLRANG

- Compensation scheme-rang daragnaba mikkang nitegijagipa aro donnua grigipa ong-na nanga. Nosto ong-ani ba gimaanina on-pilanirango sakanti duk-a-selo ga-akgipa manderangna on-a nanga; gamjin gimagiparagnasan ong-aigija, ua manderagnaba jemangan duk-a-sel sokanichi janggitangani chol aro kamrangko gimaatahachim uamangnaba on-a nanga.
- Sorkari aro dakchakaniko on-gipa agency-rang dakchakaniko on-ani cholrangko daragnaba mikkang nitegija aro darangkoba watchanggija on-a nanga jekai duk-a-selo ga-akgipa manderangni aro beneficiary-rangni list-rangko jinmana parakachi.
- Compensation gamanirango, nokdangni skotong ba chalaigipana on-gija, mande sakpraknasa on-a nanga.
- Tangka-paisani gita compensation gamanirango jiksesean on-a nanga. Bia ka-gimin jikseragnade, compensation-ko uamangni joint bank account-rangonasa chipatna nanga.
- Gamjin gimaani ba nosto ong-anirangna jekai nokrang/ring-rang/bostu ba ostrorangna,

compensation on-anirang nosto ong-gimin gam-jin ba bosturangko bretaina gita chu-ongna nanga. Chu-onga gita compensation on-aniara nangchongmotgipa ong-a maina ian manderangna uamangni janggitangani cholrangko ka-piltaina dakchakan baksanaba uamangko an-tangtangni nokdangna tangka-paisa kamainaba dakchakaniko on-jola.

- Duk-a-sel sokani somoio, nokdangni mandeni janggi gimaanina compensation-ko man-a gita death certificate dongna nangchongmotgipa ong-na nangja. India-o, ta-rakbegipa balminduri sokani ja-mano hajalni hajal manderang gimao, me-chikrang jemangan setangtangni manggisiko mesokna man-jachim, uamangna setangtangko gimaatanina on-gipa compensation-ko on-ja.
- Bia ka-gimin depanterangna cholrangko man-ani bilrang dong-genchim ong-ode (nok nosto ong-anina man-pilani bil), bia ka-gimin demechikrang, jemangan maa-pamung dongengachim, uamangnaba apsandakgipa bilrangko on-a nanga.
- Sorkarini agency-rang dakchakaniko on-gipa cholrangko aro compensation-rangko ra-ani somoirangko bakan-dike on-a nangja maina duk-a-selo ga-akgipa manderang hospital-rango ong-ani a-selo, sianggiminna duk-kalimani a-selo ba chel-bea diltugipa biaprango jeon ia on-enggipa cholrangni bidingo u-iatanirango manderang mamung kobor manjani a-selo somoi gita ia cholrangko ra-na an-tangtangko segatena man-janaba gnang.
- Nok bharao donggipa ba nok bharaoni bading chiwalaniko dakenggipa manderangni uamangni gimaatgimin ba nosto ong-giminna compensation man-ani bilko u-ie ra-chakna nanga.

4.3 NOKDANGNI SKOTONG ONG-ANI PANCHAKANIKO BON-ATANI/GIMAATANI

- 'Nokdangni skotong ong-ani pangchakanio' ong-gija, dakchakaniko aro tangka paisani gita compensation-ko mande sakpraknasa on-a nanga. Thailand-o, me-asarang nokni skotong ong-a ine chanenba, Sorkari nokdangna me-asa sianio nanga korosna, tangka-paisarangko chang-gni man-cha me-chikrangna bate gama.
- Sorkari aro dakchakaniko on-enggipa agency-rang 'nokni skotonga' gimikkon man-rikgnigipa ong-a ine chana nangja. India-o, balminduri ta-rakgipa sokani a-selo segiparang sijaskalde, bi-sarangni janggi galanina compensation-ko me-asarangni jakosa on-ronga. Iani a-selon mittam me-asarang compensation-ni gita on-gipa tangka-paisarangko nokdangni nanganirangna koros ka-gija an-tangtangna churangkosa bree bon-atskaa.
- 'Nokdangni skotong ong-ani' pangchakaniko aro ja-rikaniko tarigimin niamrangoniko, Sorkarini policy implementation acts-rangoniko aro official documentation-oniko ra-galna nanga.

4.4 DAKCHAKANI ON-ANI ARO NAMPILAONA RA-BAANI CHOLRANGNI BIDINGO U-IATANIKO ON-ANI

- Dakchakani on-ani gadangrangni bidingo u-ina nanggniko unbaksanaba ia on-enggipa cholrangko maikai ra-na nanga uarango duk-a-selo ga-akgipa manderang jemangan camp-rango, dongchakna rikgipa nokrangko aro camp-rangni aro dongchakna rikgipa nokrangni a-palo, hospital-rango, diltugipa biaprango, buring aro a-brirango dongengachim, uamangna chu-gimik u-iatanirango on-a nanga.
- Mittam jatrango me-chikrang jinmani tom-bimonganirango, jeon ia mongsonggipa u-iatanirango on-achim, uarango bakko ra-brerongja, unigimin dingtangmancha camp-rangni ning-ao uamangni dongchakenggipa biapona re-enba uamangona sokna dingtangmancha kamrangko ka-na nanga.

- U-iatanirangko u-ininggipa kattarangchi aro sakanti mandeni ma-sina man-a gitasa sena nanga.
- Poraia-skia donggijagipa manderangna u-iatanirangko sokatna dingtangmancha ja-ku de-aniko dakna nanga aro ia u-iatanirangko sokatna kamrangko ka-anio me-chik official-rangko bakko man-atna nanga.
- Me-chikrangna uamangna janggitangani cholrangko a-bachengna gita kamrang jekai narikelni bisringrangko jakkale watanirang aro sika-watanirangna, a-ani me-dik sam-dikrangko tarina aro gipin chona bading-chiwalani kamrangko ka-na gita on-enggipa cholrang/loan-rang/grants-rangni bidingo u-iatanirangko, segiparang ba nokdangni ba maharini me-asarangna u-iatgija, me-chikrangnasa joljol u-iataniko dakna nanga.
- Pilak u-iatanirangko, ua me-chikrangna jemangan jatni aro toromni gita ia u-itanirangko man-aoni champenganiko man-achim, uamangna u-iatna nanga aro jerangan u-iatanirang sokjani a-selo ua cholrangko ra-na gita galatpana man-jahachim uamangna chu-gimik dakchakaniko on-a nanga.

4.5 BI-SARANGNA PORAI-SKIANI CHOLRANGKO ON-ANI

Duk-a-sel sokani somoirango, mongsongbate poraia-skianiko ra-ani cholrang dontongani ja-mano, ma-giparang, an-tangtangni bi-satangtangni mikkangchi poraie-skie ra-ani aro uamangni dal-roroanio ma-siani bilrangko baridapatani cholrangni bidingo chanchienba jajrenganirang ong-katronga. Me-chikrangni jajrenganirangko namatna aro uamangni nanganirangko chu-sokatna gita:

- Poraie-skie ra-ani cholrangko seng-gnangan a-bachengatna man-pilna gita hall-rang ba community center-rangko on-a nanga.
- Cha-ani-ringani, skul uniform-rang, lekka-ki-taprang aro skulo jakkalna nanggipa gipin bosturangko tangka-paisa gamna nanggijaan bi-sarangna on-a nanga.
- Skulrangko man-a dipet ta-raken gipin biapona apjitenba riktaina nanga.
- Dikdiksa dongchakna rikgipa nokrang skulrangni sambao ong-na nanga.
- Bi-sarangna skulona re-rurana gita re-a-doani cholrangko tangka-paisa gamna nanggijaan on-a nanga.

BAK V:

DUK-A-SEL SOKANI JA-MAN RIKPILTAIANIKO DAKANI SOMOIMITINGO ADITA JARANGNA ARO BILSIRANGNA KAMRANGKO KA-ANI-DAKANI

Me-chikrangni nanganirangko man-atna gita, Sorkari aro dakchakaniko on-enggipa agency-rang (aid agencies) ja-ku de-anirangna chanchisamsoanirangko dakanio me-chikrangko bak-o man-chapatna nanga: camp-ko chalaianio aro disaster management committee-rango aroban rikpiltaiiani ba nampila obostaona ra-baaniko dakanirango. Duk-a-selo ga-akgipa me-chikrangni songni aro a-songni gadango pilak nampilaona ra-baani aro rikpiltaiiani gadangrango bak-ko ra-aniko nangchongmota. Me-chikrang an-tangtangni aro gipin me-chikskarangni obstako namatpilnasan kam ka-aigija, songsalni me-asarang baksa apsan bakrimenba songni manderangni namgnina kamkoba ka-na nanga. Mittam songrango aro mittam jatrangni dakbewalrango me-chikrangko dingtange chananirang aro champenganirang dongani gimin uamang cha-ani-ringani sualanioba watchangako man-ronga, unbaksanaba songni tom-bimonganirangoba uamang bak ra-pae an-tangtangni neng-nikanirangkoba aganpana man-jani gimin, dakchakaniko on-enggipa agency-rang dingtangmancha ia me-chikrangona sokna gita chu-gimik jotton ka-na nanga.

5.1 NAMPILAONA RA-BANA ARO RIKPILTAIANIKO DAKNA GITA CHANCHIANIRANG

- Me-chikrangko pilak chanchisamsoani aro dakna-ka-na miksangani gadangrango bak-ko man-atna nanga: a-songo, songo aro songko chalaianirango, dakchakaniko on-enggipa agency-rango, gipin a-songrangni aro songni NGO-rango aro songo dongkame kam ka-gipa dolrango.
- Nampilaona ra-baani aro rikpiltaiiani bidingo sorkarini kam ka-ani pangchakani ja-pangrang, ja-rikna nanganirang aro kam ka-ani bewalrang me-a-me-chikni dingtanggrikani gnanganirangko u-ininggipa ong-na nang-gen.
- Duk-a-selo ga-akgipa biaprango nampila obostaona ra-baani aro rikpiltaiianiko dakenggipa dingtang dingtang agency-rang apsan ku-cholsan ong-e kamrangko ka-na nang-gen jedakode uamang pilak duk-o ga-akgipa manderangna mikkang nigijaan dakchakaniko on-a man-gen (bimung segatgimin aro segatkugijagipa gipin songoni re-bagipa manderangrang, bimung segatgimin aro segatkugijagipa na-tok rim-e/am-e cha-gipa manderang, gipin jatni dolrang)
- Duk-a-sel sokmanani ja-mano, unit ge-sa jean dingtangmancha me-chikrangni neng-nikanirangna aro uamangni nanggnirangko man-atna gita kam ka-genchim, uko balminduri ta-rakgipa sokani ja-mano rikpiltaiianiko dakna rikgimin nokrangko a-bachengatna nanga.
- Duk-a-seloga-akgipamanderangnibidingopilakja-kude-naarokamka-nachanchisamsoanirangara miknengani aro mikkang nitea grigipa aro pilak mandenan apsan cholrangko on-gipa ong-na nang-gen.
- Sorkari aro dakchakaniko on-enggipa agency-rang duk-a-selo ga-akgipa manderango uamangna dakchakaniko on-ani programme-rangni mangsongani, a-bachengatani, nirokani aro tik ka-ani bidingo uamangni aganku-pattianiko ra-na nanga.
- Duk-a-selo ga-akgipa manderang, mongsongbate me-chikrangko uamangni janggitangani bidingo chanchisamsoanirango aganku-pattianiko ra-chengna nanga: camp-rang aro dikdikšana dongchakna rikgipa nokrangko chipani bidingo, dingtang biapona jitatani aro nokko maidaka bewalo rikgen uarangni bidingo aroban janggitanganina kam ka-ani cholrangni bidingo.
- Songsalni manderangko gipin biapona jitataniko manderangni ra-chakani ja-mansa dakna

nang-gen aroban ia kamko ka-anio mamung saloba compensation-ko on-anio donggipa pangchakani baksa nangchapatna nangja, jekai, manderang gipin biapona jitjagenchim ong-ode uamangna uamangni nok-jam aro gam-jin nosto ong-anina aro gimaanina tangka-paisarangko man-jawa.

- Gipin biapona apjitano aro camp-rang aro dikdiksana dongchakna rikgipa nokrangko chipanio, me-chikrangna chu-gimik u-iatanirangko aro gipin biapona jitna gita uamangna chu-onga gita somoirangko on-a nanga. Ba-ra-chola aro bosturangko chipanirang me-chikrangni mongsonggipa dakgni kam ong-a aro uamang nokdangni manderangni nanggirangna chanchisamsoanirango somoiko nanga.
- Dakbewalko kimkim ong-e ja-rikgipa songsalrango dingtang dingtang stakeholder-rangni pilak gadangrango chanchisamsoanirangko dakanio champenganirangoni naljokaniko man-a gita ra-chake kam ka-na miksonganichi me-chikrangna chanchipaani aro aganpaani cholrangko on-a nanga.
- Dakbewalko kimkim ong-e ja-rikgipa songsalrango, jekai Indonesia aro Pakistan-o, me-chikrangna dakna-ka-na gita bilrangko on-anirango niam tarianirang aro ja-pangrango dingtang dingtang champenganirangoni naljokaniko man-a gita dingtangmancha gadango ja-ku de-anirangko dakna nanga, mongsongbate ua niamrangko ra-galani jeon me-chikrangko nokkoni ong-kate re-ramani aro an-tangtang skako aro miksonganirangko dakanioni rak-en beng-a.

5.2 ME-CHIK/ME-CHIKMARANGNI ARO NOKDANGNI NANGANIRANGNA DONGCHAKANI NOKRANGKO RIKPILTAIANI

Me-chikrangko, uamangni nokni nanganirangna aro unbaksanaba nokrangko rikani bewalni bidingo uamangni aganpaani, chanchiani aro aganku-pattianirangko ra-na nanga:

- Nokdangni dal-ani aro mande bang-ani kri nokko rikani rokkom
- Nokrang paikarang, auchakani kuturirang aro babilsirang dongna nanga
- Nokrang chi-rangko man-a nanga aro rongtal-an-talani cholrang aro bijolirang dongna nanga
- Nokrang me-chikrangna chel-chakani aro uamangna man rakkianirang dongna nanga
- Me-chikrangni dongani, janggitangani aro kam ka-ani bewalrango pangchakesa nokrangko rikna nanga
- Janggitangani cholrang, an-seng-baljokani cholrang, skulrang aro gipin dakchakaniko on-ani cholrangko nengrae ra-na gita rikgimin nokrang chel-a biapo ong-na nangja. Re-a-doani bidingo nokdango tangka-paisani gita sinjetanirangko man-a nangja
- A-a-ko aro nokko on-ani bidingo me-chikrangni dingtangmancha mol-molanirangko ra-chakna nanga, jekai nokdang dal-giparangna apsanchapchap dake nokrangko rikani
- A-songni aro songni gadango dongkamnagipa nokrangko سوالنا gita kamo donggipa official-rangni miknengani, watchangani aro mikkang niteanirangko champengna gita dingtangmancha simsak-nirokaniko dakna nanga.

5.3 A-A, NOK ARO GAMJINNI NOKGIPA ONG-ANI BILRANG

- Sorkari, a-arangko ua manderangnasa, jemangan duk-a-sel sokani a-selo an-tangtangni dongchakenggipa biapko watna nangaona ga-akahachim, uamangnasa on-chengna nanga.

- Niamrang aro pangchakani ja-pangrangko tarina nanga jeon me-chikrangna a-a aro gam-jinrangni nokgipa ong-ani bilrangko apsan dake on-gen jechin uamang an-tangtangni segiparang/pagiparagoniko a-a-ko brena aro man-rikna gita bilko man-gen.
- Ua songsalrango jerangon dakbewal-rikbewalni gita segipani siani ja-mano gam-jin nokrangko man-rikani bilko sianggipani jonggipa ba adagipanasa on-achim, uarango jikgiparang aro demechikrang a-a-ko aro gam-jinko man-rikchina gita kamrangko ka-na nanga.
- Duk-a-sel sokna skang mechikni dowry gita on-gipa gam-jinko name simsak-niroke rakkianiko nina nanga.
- 'Nokdangni skotong ong-ani' ingipa pangchakaniko chu-gimik jegalano chu-sokaniko nina nanga maina ia chu-sokgipa ong-jagenchim ong-ode me-chikrang, duk-a-sel sokna skang, uamangni a-a-ni nokgipa ong-ani bilko gimaatanionaba sokgen.
- Jikserangni a-a, nok aro gam-jinni apsan ong-e nokgipa ong-ani bilko ma-sie ra-chakna nanga. Duk-a-sel sokani ja-mano gital tarigipa kamko chalaiani ja-pang da-ororo bilo ong-enggipa nokni padot ong-ani niamko gimaatna nanga. Jekai, duk-a-sel sokanichi a-a gimaani ba nosto ong-anina a-a on-pilaniko nokni skotongnasan (me-asa) nokgipa ong-na chu-gimik bil-ko on-gija, segipa aro jikgipana apsan ong-en nokgipa ong-ate segatna nanga.
- Duk-a-sel sokani ja-mano soktelaigipa meligrikgijanirangna, sorkari me-chikrangni a-a-ni, gam-jinni aro nokni bidingo bil man-paaniko man ra-na nanga aro uamangko saknaa aro a-rika ba rikgala man-aoni chel-chakaniko on-a nanga.

5.4 JANGGITANGANI CHOLRANGKO MAN-ANI

- Duk-a-sel sokani ja-mano skango gita apsan gadang aro cholrangko on-piltaiani aro rikpiltaiiani somoio, janggitangani aro tangka-paisa man-ani cholrangko me-chikrangna on-anio uamangna cha-ani-ringanirangko neng-nikani grian man-atna aro songsalni gadango kangal-cha-asianiko namatna dakna nanga.
- Rikpiltaiiani programme-rang dingtangmancha me-chikrangni tangka-paisa man-ani bil-o pangchakna nanga aro uamangna tangka-paisa man-pilani cholrangko dakna on-a nanga. Duk-a-sel sokani somoirango, me-chikrang jemangan segiparang/kam ka-e tangka kamaie nokna cha-anirangko ra-bagiparangko gimaatahachim, uamang tangka-paisa man-anio neng-nikanirangko man-ronga maina da-ororo gnanggipa cholrangara me-asarangnasan ong-bataia.
- Duk-a-sel sokna skang me-chikrangni janggitanganina kam ka-gipa cholrangko a-bachengatpilna man-a gita uamangna chonggipa grant-rangko on-a nanga: cha-anirangko tariani, mi bijak songe ba cha-anirangko tarie palani, chola-ba-ra sikani, budurangko sakani/tariani.
- Me-chikrangna tangka-paisa man-ani cholrangko dakna ba kamrangko ka-na aro bosturangko badinganio dakchakaniko on-a nanga.
- Gipin bakrang tangka-paisa man-ani cholrangko ra-pana man-a gita gitalgipa aro dingtanggipa changa-sapanirangko me-chikrangna skie on-a nanga.
- Chone dakenggipa bading chiwalaniko dal-ro-ro-churoroatna man-a gita me-chikrangna bank loan-rangko man-atna dakchakna nanga.
- Duk-a-selo ga-akgipa biaprango chonggipa bading chiwalani kamrangko ka-enggipa

me-chikrangna tangka-paisani gita dakchakaniko aro aganku-pattianiko on-china gita bank-rang aro gipin tangka-paisani gita dakchakaniko on-giparang aro bading chiwalanio dakchakaniko on-giparangko dingtangmancha pangkamgipa cholrangko dakchina gita dakchakani aro didianiko on-a nanga.

- Loan-rang aro tangka sroani cholrangko on-anichi bading chiwalanina kamrangko ka-anio wilwilao donggipa dongtelaigipa gamrangko nangana bate jakkalaona aro tangka sroanirang barikrikaniona sokangjana gita janggitangani cholrangko dakna dakchakaniko on-aniko niroke aro nipiltaitaie dongna nanga.
- Manderangan jerangan duk-a-sel sokna skang loan-rangko ra-ahachim, bank-rang aro gipin gipin tangka srona on-giparang, uamangna loan-rangko chotpilna chu-onga gita somoirangko on-dapna nanga.
- Sorkarirang dingtang biapona jitatgimin manderangna janggitangani cholrangko on-a nanga aroban ua biaprangko manderangna janggitanganina kam ka-ani, an-seng-baljokani, skulrang aro gipin cholrangko man-atna nanga.
- Me-chikrang, camp-rango aro dongchakani nokrangko an-tangtangni jilenggipa matburingrangni kosako chu-gimik bil dongna nanga jedakode uamang darangni champenga grian an-tangtangni jilenggipa matchurangoniko dud-rangko ra-na man-gen.

5.5 ME-CHIKRANGNA UAMANGNI MAN-GNIGIPA BILRANGNI GIMIN U-IATANI

Me-asarangni skotong ong-ani niamko be-atna gita me-chik dolrang duk-a-sel sokani ja-mano rikpiltaiani kamrangko jakkalna nanga aro me-chikrangko uamangni man-telgnigipa bilrangni bidingo agan-skie on-a nanga: national identity card-rangko man-ani aro dingtang bank account-rang dongani bil-oni a-a aro gam-jin-ko man-ani bil-on-a.

- Me-chikrangna human rights awareness education programme-rangko camp-rango ong-atna nanga aro me-chikrangna gipin biaprangko man-dikanirang dong-genchim ong-ode uamangni nokko.
- Nokdangni me-asarangni siani, gimaani ba be-enni bilgrianiko man-enba kam ka-na man-jani a-selo me-chikrangna nokni skotong ong-e gital neng-nikanirangko chagronganio mikkangpana man-a gita nanggipa changa-sapanirangko skie on-a nanga.
- Nokdangni me-chikrangni siani, gimaani ba be-enni bilgianiko man-enba kam ka-na man-jani a-selo me-asarang bi-sarangko nirok-simsakna man-a gita uamangna nanggipa simsak-nirokani gadangrangko skie on-a nanga.
- Ma-a-parang ba nokni dal-gimin manderangni siani ja-mano ma-gri pagri me-chik bi-sarangna an-tangtangko maikai simsak-nirokna nanga uarangko aganku-pattie on-a nanga.
- Awareness programme-rango, bilschi-chetni ning-ao ong-gipa me-chik bi-sarangko drae bia ka-ataniara niamni gita dosi dakani ong-a aro sasti on-aniona sokgen ine agantalate on-a nanga.
- Camp official-rang aro security personnel-na me-a-me-chikni bidingo u-iatani programme-rangko (gender awareness programmes) ong-atna nanga.

5.6 ME-CHIKRANGNA UAMANGNI MAN-GNIGIPA BILRANGKO MAMUNG CHAMPENGANI GRI MAN-ATNA UAMANGNA DIDIANIKO ARO BILKO ON-ANI

Duk-a-selo ga-akgipa me-chikrangna didiani aro dakna-ka-na bilko on-aniara uamangko

chel-chake rakkia aro uamangni man-gnigipa bilrangko man-a dakchakaniko on-a, mongsongbate ua songsalrango jeon me-chikrangko dingtange ra-enba watchangronga. Aceh aro Pakistan-o, tomromni dilgiparang me-chikrangko uamangni 'ong-gija kamni aro bewalni' a-selo indakgipa duk-a-selrangko sokata ine matnangenba uamangko bate chel-tangate dona. Unbaksanaba, Aceh-o uamang rakbata Islamic niamrangko bilo donataha jeon shariah pulisrang me-chikrangko sko kotipko wena gualanina ba gana man-janina doka. Iani a-selo, me-chikrang noktangtangoni ong-katna kenan baksanaba an-tangtangni nanganirang aro neng-nikanirangko aganrongja. Unigimin indakgipa nangchongmotaniko nanga je:

- Me-chik dolrang gipinrang baksa nanggrime/bakrimenba duk-a-sel sokani somoirango me-chikni man-gnigipa bilrangko chel-chake rakkina gita rak-en kam ka-na nanga.
- Duk-a-selo ga-akgipa me-chikrang saksa sakgipin baksa bakrimenba ku-cholsan ong-e an-tangtangni man-gnigipa bilrangko chel-chake rakkina kam ka-na nanga aro saksa sakgipinna dakchakgrikaniko on-a nanga.
- Jinmani dakchake kam ka-anichi aro ka-donganiko on-anichin ua niamrangko, jerangan me-chikrangni re-a-doani aro miksonganirangko dakaniko rak-en beng-achim, ra-galna gita dakchaka.

5.7 SAKNAA MAN-A ALTUGIPA ARO GAMCHATE RA-AKO MAN-GIJAGIPA DOLRANGNA CHEL-CHAKANIKO ON-ANI

Duk-a-selo ga-akgipa manderangna uamangni me-a-me-chik ong-anio, jat-o, dal-a-chonanio, songdonganio, toromo, gipin biaponi jitbaanio aro bimung segate donanio panchakgija uamangni man-telaigipa bilrangko A-dokrang ra-chakna nanga, man ra-na nanga aro ua bilrangko man-atna A-dokrangni dakna nangtelgipa kam-an ong-a.

- Duk-a-sel sokanina dakchakaniko on-anirang mandena ka-sagipa aro uamangni janggitanganina namgnio aro manderangni man-telaigipa bilrangko pangchakesa on-a nanga.
- Sorkari aro dakchakaniko on-enggipa agency-rang me-a-me-chik ong-anio, dal-a-chona gadango, jat-o, toromo, bilschi aro uandakgipa gipinrang pangchakgija dakchakani aro rikpiltaiani kamrangko ka-na nanga.
- Pilak manderangnan salantio nanggipa cha-ani, ringani chi, dongchakani nok aro an-seng-baljokani cholrangko man-atna gita, sorkari aro dakchakaniko on-gipa dolrang (relief organizations) dingtangmancha gamchate ra-gijagipa dolrangona jekai gipin biaponi jitbagipa, dalit-rang, torom aro jatni gita bang-gijagipa manderang, an-tangtangni be-en-ko pale cha-giparang, na-tok rime pale cha-giparangona sokna gita jotton ka-na nanga.
- Me-chikrangko, ua policy-rangna jerangan duk-a-selo ga-akna altugipa me-chikrangni jekai, gipin biaponi re-bae hajira ka-giparang, dalit me-chikrang, manderang jerangkon a-songni dongkamgipa ong-ja ine chanachim, dingtang dingtang jatni bal dolni me-chikrang, sagalo songrekame donggiparang aro dingtang dingtang bakrangko aro gadangrangko kam ka-gipa me-chikrangni man-telgnigipa bilrangko chel-chake rakkiaachim, uarangko man-atna gita me-chikrangna didianiko on-a nanga.
- Gipin biaponi re-bae hajira ka-giparangko, bimungtangtangko segatgimin (lekka panja donggipa) ba segatgijagipa (lekka panja donggijagipa) ong-oba, miknengna aro watchangna nangja aro uamang on-enggipa dakchakani cholrangko man-a nanga: cha-ani-ringani, dongchakani nok ba biap aro an-seng-baljokani cholrang.

- Sorkarirang gipin biaponi kam ka-na re-bagiparangko duk-a-sel sokani somoirango rim-na aro a-songoni rikgalna nangja.
- Sorkarirang, da-o bilo ong-enggipa niamrang aro segatani gadangrangko (registration processes) che-em che-em nipiltaie gipin biaponi kam ka-na re-bagipa manderangni man-telgnigipa bilrangna chel-chakaniko on-a nanga aroban ua manderangna segatani aro niamni gita cholrangko man-paanikoba nina nanga.
- Sorkarirang gipin biaponi kam ka-na re-bagipa me-chikrangko nokko ba kam ka-chakgipa biaprango ong-gija jakkalako aro saknaa man-aoni chel-chakaniko on-a gita nanga ja-ku de-anirangko ra-na nanga.

5.8 SEGRI ME-CHIKRANGONA ARO ME-CHIKRANGCHI CHALAI GIPA NOKDANGRANGONA, BE-ENNI BILGRIANIKO MAN-GIPA MANDERANGONA ARO BUDEPA-BUTCHUMARANGONA SOKANI

Segrirang, nokni skotong ong-e nokdangko chalaienggipa me-chikrang, be-enni bilgrianiko man-giparang aro budepa-butchumarangona sokna gita dintangmancha ja-ku de-aniko dakna nanga. Mittam songsalrango ba dakbewal-rikbewalrango, segri me-chikrangko doloniko ba songsaloniko changalako aro namgija dakako aro on-enggipa dakchakanirangoniba watchangako man-ronga.

- Ua songsalrango aro dakbewal-rikbewalrango jerangon me-chikrangko ma-eke donani bewalko jakkalachim, uarango be-enni bilgrianiko man-giparang, budepa-butchumarang aro me-chikchi chalaienggipa nokdangrangni, on-enggipa dakchakanirangko man-aniko nina nanga.
- Nokdangko chalaienggipa me-chikrangni aro segri me-chikrangni (duk-a-sel sokna skang aro duk-a-sel sokani a-selo segri ong-giparang) nokni, a-ani aro gamjinni kosako man-gipa bilrangna chel-chakaniko on-a nanga.
- Camp-rang aro dikdiksana dongchakna rikgipa nokrango rikgipa paikarang aro auchakram biaprango be-enni bilgrianiko man-gipa manderang nengnika grian jakkalna man-a gita dintangmancha tarina nanga.
- Camp-rango be-enni bilgrianiko man-gipa manderangna indakgipa cholrang dongjagenchim ong-ode, uarango uamangna da-o gnanngipa donggimin cholrang dongchakani nok baksa on-a nanga.
- Dakchakaniko on-anirang jekai su-dike re-ani gol-dikrang, nachil knagijagiparangna nachilo teke knana man-ani cholrang, chosmarangko man-a dipetde seng-gnangan manatna aro sokatna nanga.

5.9 ME-CHIK/ME-CHIKMARANGNA CHEL-CHAKANIKO ON-ANI – DUK-A-SEL SOKANIO ARO DAKGRIK DINGGRIKANI SOMOIRANGO SAKNAANIKO MAN-GIPARANG

Dakgrik-dinggrikani somoirango chagronggipa aro saknaa man-gipa me-chikrang meligrikijagipa dolrangni jakchi watchanga, saknaa man-ata aro namgija dakako man-a altubea. Uamangna dakchakaniko aro chel-chakaniko on-a jotton ka-na nanga.

- Sorkarirang aro gipin a-songoni dakchakaniko on-gipa agency-rang, mongsongbate UN, meligrikijagipa dolrangko meli-nanggrimatna nangani aro tom-tomaniko ra-bana nanganiko mongsonggipa ong-e dona nanga.
- Duk-a-sel ong-gipa biaprango pilak sipairangni kam ka-anirangko man-a dipetde seng-gnangan dontongatna nanga.

- Mandeni namgnina dakchakaniko on-gipa agency-rangko (humanitarian aid agencies) man-a dipetde seng-gnangan indakgipa meligrikijani gapgipa aro so-sojengjeng ong-enggipa biaprangona rimangna aro dilangna nanga.
- Manderangni mamung champengani grian re-na-dona aro sualenggipa dakchakngigipa bosturangko manatna nanga.
- Manderangko janggitanganina aro cha-na-ringna cholrangko on-giparangoni jekai sagal, buring-bolgrim, ge-e game cha-na a-a-oniko mamung dakeba champenganiko dakna nangja.
- Sipairangko, uamang meligrikijagipa dolrangoni ong-genchim ong-ode, 'chel-chake dongna nangani a-selo ong-ani gimin' uamangko IDP camp-rangko dontongatna ba neng-takatna nangja. Sri Lanka-o, sorkarini sipai kotokrang camp-rango dongani a-selo jensalo Tamil Tigers-rang sorkarini chel-chakgipa dolrangko chadrapahachim uno ramram manderangni janggirang gimaaha.

**ME-A-ME-CHIKNI BIDINGO U-IANI ARO SONGSALNI GADANGO
CHANCHISAMSOANIRANGKO DAKANIO JA-RIKNA NANGGNIRANG**

6.1 A-SONGRANGNI KAM KA-ANIRANG

- Duk-a-sel sokgipa biaprangona sokange ua a-songni Sorkarirangna aro dakchakaniko on-enggipa agency-rangna jemangan dakchakaniko aro nampilaona ra-baani kamrangko ka-engachim, uamangna me-a-me-chikni bidingo u-ie kamrangko ka-anio aganku-pattiani aro dakchakaniko on-a man-a gita international women's disaster response agency-ko a-bachengatna nanga.
- Dakna nanggniko segiminko nangchongmota maina iachin disaster team-rangko nanggipa dakchakanirangko rang-sanana on-a man-a gita bilongen dakchakbegen.
- Me-chikko mongsonggipa ong-e ra-gipa disaster management policy-rangko, gipin a-songni Sorkari aro non-government agency-rang, jerangan disaster management-ni bidingo skanggipa kamrangko ka-achim, uarang baksa apsan bakrimatna nanga.
- Me-asarara gapaigipa dolrang jekai chel-chakgipa dolrangko duk-asel sokanina skanggipa kam ka-chenganio naljokaniko on-gipa kamrangosan bak man-ataina nanga. Pilak dakchakaniko on-ani kamrangko, mongsongbate camp-ko nirokani aro dakchakgnigipa bosturangko sualaniko manderangni dolrangsa simsak-nirokna nanga, aro iano komibeoba 50% me-chikrang dongna nanga.

6.2 A-SONGNI KAM KA-ANIRANG

- Duk-a-sel sokani ja-manjoljolan, me-a-me-chik apsan donggipa disaster relief committee-rang, jerangan duk-a-selo ga-akgipa committee-rangna dakchakaniko on-a me-chikrangni nanganirangko mongsonggipa ong-e ra-achim, uarangko a-bachengatna nanga.
- Disaster relief committee-rangna, duk-a-sel sokani somoirango me-chikrangni nanganirango pangchakesa skie on-anirangko dakna nanga.

6.3 DINGTANGMANCHA JA-KU DE-ANIRANG

- Cha-anirangko jatni aro songsalni cha-rongbewalosa pangchake sualna nanga aro dingtang dingtang rokkomrangni ong-na nanga: adita jarangna manderangko noodles-rangko salsal cha-nade ka-dongnabe. Me-chikrangni dolrang, cha-anirangko sualanina chanchisamsoanio, a-bachengatanio aro nirok-simsakanio, mongsonggipa ong-na nang-gen.
- Duk-a-selo ga-akgipa manderang an-tangtang janggitanganina kam ka-enba an-tangtangko alduna man-kujana dipetnade cha-anirang aro unbaksanaba dud aro chini-rangko salantin sualna nanga. Nokdangrang jerangon bi-sarang, mongsongbate bakgitchak bi-sarang dongachim, uamangna cha-anirangko sualanio dud-ko mongsonggipa ong-na nanga. Unbaksanaba, duk-a-selo ga-akna altugipa dolrang, mongsongbate okngangenggipa me-chikrang, segrirang, budepa-butchumarang aro ma-gri ong-gipa bi-sarangna janggitangani cholrangko man-atkujana dipetnade uamangna cha-anirangko sualna nanga.
- Manderangni gisiko uamang sakgipinna gro nanga ine chanchianiko ong-katatgija ba uamang camp-ko nirokengkiparagoniko cha-anirangko biamna nanggija, mandeni man-ko rakkia gnangsa aro uamangna ka-saa gnangsa cha-anirangko sualna nanggen.

- Me-chikrangko sualenggipa dakchakanirangko an-tangtangan ra-echina gita didiani aro ka-donganiko on-a nanga. Dakchakaniko sualenggipa biaprango paikanarang, chi-rang aro salakkimo a-songe senganirang dongna nanggen.
- Ua songsalrango aro ua jatni dakbewalrango jerangon me-a-me-chikko dingtangrike chanachim, uarango me-chikrang, gnanggipa dakchakgnigiparango sualani biaprangoniko mamung neng-nikani aro champengani grian ra-na man-a gita, dingtanggipa chadenge sengani biaprangko on-a nanga.

6.4 Camp-ko Simsak-Nirokani

- Me-chikrangna chel-chakaniko on-a man-a gita me-chikrang gnanggipa camp management committee-rangko a-bachengatna nanga. Me-chikrangni aro bi-sarangni kosako ong-gija kamrangko aro saknaa man-atani kamrangko ka-aoni champengsoanirangko dakna man-a gita, segimin aro ku-sikchi agangipa chel-chakani niamrangko committee-rangna taridaptaichina on-a nanga. Camp ning-arango ba camp sambarango ong-gija kam ka-anirangko rang-sanana u-iatna man-a gita me-chikrangna dakna nanggnirangko dingtangmancha skie on-a nanga.
- Camp-rango walo nirokgiparango dona nanga. Nirokgiparango (me-asarang ong-na nangade ong-ja) me-chikrangna simsakaniko, dakchakaniko aro chel-chakaniko on-a nangani bidingo skie on-a nanga.
- Mande jinmani jakkalgipa biaprang jekai ramarang, paikanarang aro kal-chakram biaprangko me-chikrang, budepa-butchumarang aro bi-sarang nengrae chel-chaka gnang jakkalna man-a gita bijolirangko ching-atna nanga.
- Camp-rang aro didiksana dongchakna rikgipa nokrangko chipani somoirangni bidingo duk-a-selo ga-akgipa manderango sing-chenge uamangni apanpaaniko ra-chengna nanga. Iarangko chanchianio me-chikrangko mongsonggipa ong-e dona nanga aro uamangna u-ina nanggnirangko u-iatna nanga aro biap jitna gita chu-onga somoirangkoba on-a nanga. Ba-ra-chola tem-e bosturangko chimonge katome donaniara me-chikrangni mongsonggipa dakgni kam ong-a aro uamangna nokdangni manderangni nanggnirangna chanchisamsoanio somoiko nanga.
- Je camp-oban paikanarang aro auchakram kuturirangko me-chikrangna dingtang rikna nanga.
- Saknaa man-aoni chel-chaka gnang aro mamung kenani grian me-chikrang saloba waloba jakkalna man-a gita paikanarang aro auchakram kuturirangko dongchakenggipa nokrangoni chel-tange rikna nangja aro uarango bijolirangko teng-atna nanga.
- Paikanarang aro auchakram kuturirangna jakkalgipa bosturangko skatang kal-akna aro nengrae nosto ka-na manjana gita name pangkame aro baikame tarina nanga.
- Segrirangna, segipa rakkugijagipa me-chikrangna, me-asa nokni skotong ong-e nokdangko chalaienggiparangna jeon be-enni aro gisikni gita bilgrianiko man-giparang aro budepa-butchumarang gnangchim, uamangna nokkoni nokkona re-e tent-rangko sualna nanga.
- Gitcam bewalo tarigipa tent-rang jerangni samtangtangan gitcingenba jitna aro re-na gita biaprang apchangketachim, uarangko namdapate tarina nanga. Tent-rangko balwa jokna man-eba tarina nanga. Me-chikrang bang-bata somoion tent-ni ning-ao dong-batani gimin tent-ni ning-ao balwa ka-sinatani aro dingtani cholrangkoba man-atna taridapna nanga maina tent-rangni ning-ao sin-karirango bilongen sin-data aro ding-karirango bilongen ding-data.

- Tent-rango tuchakaniko aro ba-ra-cholarangko nosto ong-aoni aro sosiaoni chel-chake rakkina gita dingtangmancha donchakani biaprangba dongna nanga.
- Me-chikrangna ken-chakani gri aro chel-chakani gnang ong-e tent-rangko mangrake tarina nanga.

6.5 AN-SENG-BALJOKANI CHOLRANGKO MAN-ANI

- Me-asarang, me-chikrang aro bi-sarangna pilak dakchakaniko on-ani policy-rangon trauma care centre-rang mongsonggipa bak ong-na nanga.
- Gisikni gita duk-o ga-akgipa me-chikrangna, mongsongbate segiparang aro bi-satangtango gimaatgiparangna dingtangmancha simsak-nirokaniko on-a nanga, aroban uamango ong-katenba jinma baksa bakko ra-china gita didianiko on-a nanga. Health workers-rangna dakchakaniko on-a gita camp-rango dakchakgipa dolrangko (support groups) bikotna nanga.
- Okgnangenggipa me-chikrang aro atchidal dal bi-sa gnanggipa ma-giparangna dingtangmancha trained health professional-rangchi simsak-nirokaniko on-a nanga. Women health workers-rang pilak camp-rangon dongna nanga aro uamang nokkoni nokona re-e nianirangkoba dakna nanga.
- Mobile health services-rango me-chikrangni bi-sa ba-anio aro nokdang dakanio nanggipa an-seng baljokani cholrangban dongchapna nanga.
- Duk-a-sel sokani ja-mano an-seng baljokanina on-gipa cholrangko da-o songo dongenggipa an-seng baljokani cholrang baksa aroban gipin an-seng baljokani cholrangko on-giparang jekai, anganwadi centre-rang aro bi-sa ba-anio dakchakaniko on-pagipa me-chikrang, baksa apsan bakrimatna nanga.
- Duk-a-sel sokani ja-mano songni gadango jinmani an-seng baljokanina campaign-rangko ka-anio ma-giparang aro abo/am-birangona sokatbo.
- Post disaster public health education-o me-chikrangni saknaa man-a altuanirangko on-chapbo. Songsalni gadango donggipa me-chik dolrangna jemangan me-chikko ong-gija jakkalanina aro duk-a-sel sokanio saknaa man-anina kamrangko ka-engachim uamangna chu-onga gita nanggipa dakchakani aro cholrangko on-a nanga.
- Gisikni gita an-seng baljokaniko on-giparangna me-a-me-chikni gisiko so-sojengjeng sokanirangni bidingo skie on-anirangko dakbo jedakode uamang saknaaniko man-a altugipa dolrangna jekai skotong ong-e nokdangko chalaienggipa me-chikrang, ma-gri pagriko nirokenggipa ambirang, doka satako man-gipa me-chikrang, be-en bilgri ong-e saknaaniko man-gipa me-chikrang, segri jikgri ong-gitalrang, ge-e game cha-giparang aro gipinrang jemangan an-tangtango so-ote siaona sokna altuachim uamangna nanga gita ka-donganiko aro aganku-pattianirangko on-a man-gen.
- Me-chikrang jemangan banggria sokani a-selo saknaa man-enba be-enni bilgrianiko man-aoni nambapilengachim, me-chikrang jemangni saknaaniranga be-enni bilgrianiona soka aro jemangan dikdiksana be-enni bilgrianiko man-aoni nambapilengachim uamangni an-seng baljokanina nanggirangko mongsonggipa ong-e dona nanga. Uamangni nokdangni manderang aro bi-sarangko nirokgiparangna dakchakaniko on-bo jekai uamangna nirok-simsakaniko on-pilskaani, tangka paisani gita dakchakaniko on-ani aro aganku-pattianirangko on-ani.
- Nokdangni butchumarangni an-seng baljoke donganina nanggipa cholrangko dingtangmancha dona nanga maina uamangni be-enni aro gisikni gita an-senge donganiara dal-gipa nokdangrangode mongsonggipa ong-a.

- Sana banani aro an-seng baljokanina dakchakani cholrangko on-anirangko jinmana u-iatna nanga aro iarangko medical centre-on on-a nanga, maina duk-a-selo ga-akgipa nokdangrang indakgipa somoirango ia on-enggipa an-seng baljokani cholrangko ra-na gita neng-nikanirangko chagrongronga. An-seng baljokanina dakchakaniko on-enggipa bakrango dingtangmancha ma-siani cholrangko dona nanga jedakode health workers-rang dakchakaniko nanggipa beneficiary-rangko ma-sie ra-enba uamangna dakchakaniko on-a man-gen. Be-enni bilgrianiko man-gipa me-chikrangko, be-enni bilgrianiko man-gipa manderangna simsak-nirokani cholrang nanggipa special care centre-rangona jitangna nanga. Je obosta ong-genchim ong-oba, uamango tent camp-rango dongchina drana nangja.

6.6 NOSTO ONG-ANI ARO GIMAANINA DAKCHAKANI GITA TANGKA ON-PILSKAANIRANG (COMPENSATORY PACKAGES)

- Tangka on-pilskaanirangko dakanio, me-chikrangni dingtangmanchananganirang, mongsongbate saknaa man-aniona ga-akna altugipa dolrang jekai segrirang, bia ka-kugijagipa me-chikrang, aro be-enni bilgrianiko man-gipa me-chikrang ba me-chikrang jeni nokdango be-enni bilgrianiko man-gipa me-asarang gnangchim, uarangko nigrikesa chanchisamsoanirangko dakna nanga. Unbaksanaba, me-asani skotong ong-ani aro bil man-ani dakbewal rikbewalrangko ma-sie ra-na nanga aro ia ja-rikanirangni a-selo me-chikrangko watchanganirangko champengna gita policy-rangko tarina nanga.
- Aroban, nosto ong-ani aro gimaanina tangkarangko on-pilanirango, me-chikrangosa ua on-enggipa tangkarangni kosako chu-gimik bilko man-atna gita pangkamgipa kam ka-ani bak dongna nanga. Namgipa kam ka-ani gadangko tarina nanga jechin man-gnirangko kakketgipa beneficiary-rangona sokatna man-gen.
- Bia ka-gimin depanterang compensation-ko man-ani bilko on-genchim ong-ode, jekai nok nosto ong-anina compensation, indakode demechikrang jemangan ma-a-pa baksa dongengachim uamangnaba apsan bilrangko on-pana nanga.
- Duk-a-sel sokani ja-mano gital tarigipa policy-rang da-o dongenggipa me-asani skotong ong-e bilrangko man-aniko be-atna nanga. Jekai, duk-a-sel sokanichi a-a nosto ong-anina a-a-ko on-pilskaanirango, nokni skotongna (me-asa) chu-gimik nokgipa ong-ani bilko on-gija, jiksesanan apsan ong-e nokgipa ong-ani bilrangko on-a nanga.
- Me-chik dolrang duk-a-sel sokanichi ong-katgipa cholrangko jakkalenba, da-o dongenggipa me-asani skotong ong-aniko be-atna nanga aro me-chikrangna uamangni man-gnigipa bilrangni bidingo skie on-a nanga: a-songni identity card-rangko man-ani bil, an-tangtangna dingtang bank account-rangko kulipaani bil, a-a-ni nokgipa ong-ani bil.

6.7 ME-CHIK/ME-CHIKMARANGNA DONCHAKANI NOK/BIAPRANG

- Me-chikrangni dongchakani nokrangko me-chikranga chalaina nanga. Me-chik dolrangko me-asarangni ning-o donaniko, mongsongbate Armed Forces-rangni ning-ao donaniko ra-chakna nangja.
- Songdonggipa me-chikrang pilak dakna-ka-na chanchisamsoanirango aganku-pattianiko ra-na nanga aro uamango bakko ra-china didianiko on-a nanga.
- Me-chikrang aro uamangni nokdangni manderangni dongchakenggipao bia ka-kugijagipa me-asarangko dongpana gita biap on-a nanga. Dal-gimin me-asarangnaba, je ua nokdangni mande ong-genchim ong-oba ua dongchakenggipa noko, biapko on-a nangja.

- Me-chikrangni dongchakenggipa nokrangona re-bagipa-robagiparanko champengna nangja aro me-chikrang dakchakaniko nangenggipa manderangona sokna gitaba man-a nanga. Ianoba mingsa neng-nikani gnang maina bang-bea namgijako dakna chanchie donggipa dolrangban me-chikrangona sokna altuskagen, indiba iana chel-chakani aro naljokani gnanggipa cholrangko me-chikrangna dona nangskagen.
- 'Dikdikšana' dongchakna rikgipa nokrang ru-uta somoirangonan ong-kamangaiani gimin, ia didiksana dongchakna rikgipa camp-rango me-chikrangni naljokani aro chel-chakna nanganirangko mongsonggipa ong-e dona nanga, jekai, chu-onga gita bijoli teng-atachi, darangni champenga grian an-tangtangna somoiko on-a man-ani cholrangko on-achi.
- Operate ka-gimin, duk-a-sel sokaoni naljokatako man-gimin be-enni bilgrianiko man-gipa manderang aro uamangna simsak-nirokenggipa manderangna simsak-nirokaniko dakna gita dikdikšana dongchakna rikgipa nokrang biap aro cholrangko on-a nanga.
- Rikgimin nokrangko jikgiparang aro segiparangni bimungo ainni gita segate apsan nokgipa ong-atenba me-chikrangni nokni kosako bilko man-aniko baridapatbo.
- Gital rikgipa nokrangko dongchaknagipa manderangko tik ka-anio, saknaa man-a altugipa me-chikrangko mongsonggipa ong-e donbo, jekai, segri ma-giparang, segrirang, kangal cha-asigipa aro janggitanganina kam ka-na chol donggijagipa me-chikrang, songsalo watchanga man-gipa me-chikrang aro songo poraia skia man-gipa gisik seng-gipa me-chikrangni sandie ma-sie ra-gimin gipin manderang.
- Me-chikrangna nok rikani kamrango apsan ong-e cholrangko on-a nanga. Janggitanganina kam ka-anio pangchakgipa kamrangna changa sapanirangko skie on-a nanga. Mongsonggipa project-rangna changgipa sapgipa aro skia poraia gnanggipa me-chikrangko sandibo, jekai nok rikaniko nirokenggipa engineer-rang.
- Bading chiwalaniko dakenggipa me-chikrang baksa contract ka-bo aro kamo changgipa sapgipa me-chikrangni rikani kamrango aro uandakgipa apsananggipa bakrango bak ra-paaniko sandibo aro mol-molbo.
- Pilak jatni aro gadangni me-chikrangni, songni manderangko gipin biapona jitani, gital biaprangni, rikgnigipa gital nokrangko tariani aro songo gital cholrangko tarianirangni bidingo chanchianirangko dakaniko ra-dona gita dakchakbo.
- Me-chikrangni kam ka-anio sinjetaniko komiatna ba me-chikrangni aro uamangni nokdangni manderangni janggitanganina aro kam ka-ani bewalko namdapatna dakchakna gita nokrangko rikna chanchisamsoanirango songni me-chikrang baksa bakrime kam ka-bo.

6.8 ME-CHIK/ME-CHIKMARANGNA JANGGITANGANI CHOLRANG

- Beneficiary-rangna uamangni jakkalgigipa aro uamangna namgniko ra-bana gita tarigimin programme-rang aro policy-rangni bidingo chu-gimik u-iataniko on-bo. Uamangna on-enggipa cholrangko man-atna dakchakaniko on-a nanga maina uamang an-tangtangride dingtang dingtang on-enggipa cholrangko ra-na gita, jekai vocational training-ni bidingo, mamung u-ianirang dongja.
- On-ronggipa cholrangna skie on-anirang baksanaba gitalgipa vocational training-rang, jekai matburingrangko jilani, ba-ra-chola sikani aro koanirangkoba on-chapna nanga.
- Me-chikrangna janggitanganina aro namroro-silroroanina dakchakgipa ong-a ine ra-enba uo

pangchake chanchisamsoanirangko dakbo: pangkamani donggijagipa kamrangni bakrangko miksonge dakbo.

- Me-chikrang, jemangan pangkamgipa wilwilao gnanggipa cholrangko pangchakachim, jekai kari tarigiparang, a-a ge-e game cha-giparang, bolni sekkioniko atta tarigiparang, uamangni tangka paisa gimaanina tangka paisa man-ani cholrangko a-bachengatna nanga. Tangka paisa man-atgnigipa cholrangko tangchapilatna dakchakgiparangko mongsonggipa ong-e donbo, jekai, chi jok-ame donggiparang, kari gnanggipa pokkrirang, jilgipa matburingrangna cha-anirangko tariani.
- Noksa salna changgipa ba daka rikao sapgipa manderangna aro noko donge kam ka-gipa me-chikrangna uamangni nosto ong-gimin bostu ba ostromrangko bodolna, kam ka-chakani biaprangko dal-dapatna, jakkaltogipa ostromrangko bredapna, bosturangko chimongna, tangka paisa, bosturangko ba cholrangko tangka paisa gamsogija man-a, bajar/antiona neng-nikaniko chagronga grian sokna aro gipin tangka paisani cholrangna grants aro loan-rangko man-atna dakchakaniko on-a nanga.
- Bading chiwalani aro dal-ro-ro-churo-roanina taridapanirango man-a dipet ta-raken me-chikrangni kam ka-ani aro janggitanganina cholrangko baridapatna kam ka-jolna nanga.
- Me-chikrang man-gipa cholrangko jakkalgipa aro uarangko nirokkiparang ong-a ine ra-chakenba, gamjin, biaprang aro gipin cholrang gita dingtanganirangko ra-bana nanggiparangko namdapatani ba bodolna nanggnigiparangni bidingo uamangni aganku-pattianirangko ra-na nanga, jekai noko ba songsalo mikka chiko chimongani cholrang, jilgipa matburingrangna cha-anirangko chimonge donanirang.
- Kam ka-anina hajirarangko man-ani, skie on-anirangko man-ani aro private aro public relief work project-rango bak man-paaniko nirokna nanga aroban uarangni me-chikrang aro me-chik bi-sarango nangchakeanikoba nipiltaina nanga.
- Akal karap aro banggrianirang sokanichi me-chikrangni janggitanganina cholrangko dakanio aro bading chiwalanio nangchakeanirangko nirokanirangko dakna nanga, jekai, bazaar antirang namgijani, client-rangko gimaatani, gamjinrangko drae palani, gipin biapchi jitna draatako man-ani, me-chikrangni nokni skotong ong-ani baririkrikani, dikdiksa somoina ong-aigipa kam ka-anirang aro uandakgiparang.
- Me-a-me-chikni maiba kam ka-anirangna aganchakani cholrangko taribo, jekai nok rika-tariani kamrango ka-enggipa me-chikrangni percentage, me-chikrangni economic recovery grant aro loan fund-rangko man-anirangni nangrimani.
- Me-chikrangni economic recovery package-rango bak ra-na man-ani aro uaragoni namgniko man-dapanirangko nipiltanianiko dakna nanga, jekai, me-asarang baksa tosusaenio, me-chikrangara baditana kingking nengrae jitna man-a? Child care center-rang kamo ong-engama? Saknaa man-gipa nokdangni manderangna sana bananiko dakani minggipin cholrang dongama?
- Pilak nipiltaini aro tik ka-ani kamrango me-a-me-chikni nanggrimaniko dingtang dingtang dake mesokaniko dakchapna nanga. Iako chu-sokatna gita me-a-me-chikni bidingo pangchake u-ina nanggnirangko chimongbo ba taribo.

6.9 ME-CHIKRANGNA BILKO ON-ANI

Songsalni manderang aro nokdangrang jemangan an-tangtangna janggitanganina cholrangko rikpiltainigachim, uamangna me-chikrangni u-ianiko aro changa sapanirangko nangchongmota. Ia

cholrangko man-a aro jakkalna gita, janggi naljokako man-giparang dal-batsranggipa nanganiara uamangna bilko on-ani aro an-tangtangna kimkim ong-anian ong-a ine chanchiatenba, disaster responders-rang (duk-a-sel sokanio dakchakgiparang ba kam ka-chenggiparang) me-chikrang baksa apsan bakrime kam ka-rimna nanga.

- • Songsalo da-o kam ka-anirango aro chanchirimanirango duk-a-sel sokani obostarango komiatani kam aro cholrangko bakrimatbo. Me-chikrangni dakenggipa kamrangko ma-sie ra-bo aro uamang baksa bakrimbo, aroban uamangni rake kam ka-anirango chu-sokatna gita dakchakbo.
- On-gilgipa relief fund-rang aro sorkarini fund-rangko sualana aro jakkalanina mongsonggipa chanchirimanirango dakanio me-chikrang jemangan me-chikrangni neng-nikanirangni bidingo chu-gimik ma-siachim uamangkoba dongatpabo.
- Duk-a-sel sokanio nangchakegipa biaprango donggipa me-chikrang, me-chikrangni bureau-rang aro me-chikrangna dakchakgipa dolrang baksa da-o ong-enggipa aro mikkangchina chanchianirangna da-on chanchisamsoaniko dakbo.
- Me-chikrangni bak ra-na man-anio pangchakenba taripiltaia aro rikpiltaiaina chanchisamsona tom-bimonganirango ong-atbo, jekai, bi-sarangna simsak-nirokaniko aro re-a-doani cholrangko on-ani aro me-chikrangni choljoka somoi aro biapo tom-bimonganirango ong-atani.
- Ainni gita dakchakaniko nangenggipa me-chikrangna chu-gimik nirokani aro dakchakaniko on-bo, jekai, nokni bidingo, janggitanganina kam ka-ani aro nokdango tom-tome melie-nanggrime dongani bakrango.
- Dakchakaniko on-ani aro skanggita apsan obosta aro nampilaona ra-baani kamrango somoini kri sokgipa me-a-me-chikko dingtanggrike chanani aro apsan ong-gijanirango nirokbo, jekai, me-chikrang jemangan nokko, kamo aro songsalo simsakna nanganirang aro dakna nanganirang bang-achim, uamangna ka-dongsogijagipa sin-jetanirang sokani.
- Me-chikrangni dormahana aro nokna minggni dake kam ka-aniko ra-chakenba dakchakaniko on-bo; uamangna jemangan dakchakani cholko ra-na gita somoi nangengachim, nokgitalona jitna am-engachim, nokdangni saknaa man-gipa manderangko dakchakna aro uandakgipa gipin cholrang jerangan nokdangna namgniko ra-bagenchim uarango man-a gita kamo rimnappiparangmung kam ka-enba nokdangni manderangna neng-nikani gri gipa aro namgniko ra-bagipa policy-rangko taribo ba mangrakbatatbo.
- Simsak-nirokengiparangna tangka-paisani gita dakchakaniko on-a aro uamang saknaa man-giparangna, ma-a-pa ma-drang donggijagipa bi-sarang aro be-enni gita bilgrianiko man-giparangna nirok-simsakaniko on-angkuchina gita nokdangna simsak-nirokaniko on-enggipa manderangna sorkarini tangka-paisa on-enggipako, ia chugimik nampilaona ra-baani somoio, ra-doangkuna nanga.
- Nokdango dakchakgnigipa aro nampilaona ra-bana dakchakgiparangko chu-gimik apsan ong-e sualaniko nirokbo.

6.10 BE-ENNI GITA BILGRIANIKO MAN-GIPA MANDERANGNA APSAN CHOLRANGKO ON-ANI ARO UAMANGNI CHU-GIMIK BAKKO RA-ANI

Me-a-Me-chikni Apsan Chanchiano (gender mainstreaming) manderang jemangan re-a-doanio, knaanio, nikanio, agangrikanio aro ba poraie-skie ra-anio neng-nikanirango man-engachim, uamangni nanggnigiparangna chu-gimik bak ra-aniko aro dingtangmancha simsakaniko on-anikoba

daka.

Ramram somoirangode, People with Disabilities-rangko (PWDs) gamchate ra-ja, aroban ia obosta duk-a-sel sokani somoirango batbata. Be-enni bilgrianiko man-gipa me-chikrang duk-a-sel sokani somoirango saknaa man-a altugipa obostarango ga-akronga. Iani bidingon disaster management-ni pilak gadangon persons with Disabilities-ni dingtangmancha nanggnirango chu-sokatna kam ka-na nanga, jedakode uamang nokdangni aro songsalni gadango an-tangtangni mikkim aro rasongko ra-dona man-gen, jechin mikkangchi uamangko uamangni man-gnigipa bilrangko man-atna gita dakchakanggen.

- Be-enni bilgrianiko man-ani bidingo chanchianiko, be-enni bilgrianiko man-anichi ong-katgipa obostarango ba neng-nikanirang aro persons with disabilities-ko a-songo aro a-songrangni action plan-rango aro policy-rango nakatatachi, rang-san dakna-ka-na nanggnirango aro tarisamsoanirango man-chapataniara pilakkon apsan ong-e chananio aro manderangni man-gnigipa bilrangko man-atanio nangchongmotgipa ong-a.
- Duk-a-sel sokanio saknaa man-giparangna dakchakgnigiparangko sualanio PWDs-rangni kosako miknenggijani aro watchanggijani kamrangko dakna nanga. Be-enni gita, songsalni gita, bading chiwalani gita aro dakchakgnigipa bakrangoni champenganiko man-anirang, ramram manderangna bate, persons with disabilities-rangosa bilongen nangchakebata. Cholrang chu-onga gita dongjani somoirangoba be-enni bilgrianio pangchakenba watchanga man-a altuanirang gnan. Iani a-selon rang-san on-enggipa cholrangko ra-aoni, unbaksanaba manderang jemangan duk-a-sel sokna skangan be-enni bilgrianirang dongachim aro manderang jemangan duk-a-sel sokanichi be-enni bilgrianiko man-achim, uamangna ru-uta somoina nampilna dakchakgipa cholrangko ra-anio apsan ong-e man-gijagipa obostaona sokata.
- PWDs-rangko duk-a-sel sokna skangan sandie ma-sie dona nanga aroban uamangni mai bilgriani gnan aro duk-a-sel sokani ja-mano uamang maidakgipa dakchakanirango nanggenchim uarangkoba ma-sie ra-na nanga. Duk-a-sel sokani somoio manderangko naljokgipa biapona rimjitango, PWD-rang maimai dakgipa neng-nikanirango chagronggenchim uarangkoba ma-sina nanga.
- Persons with disabilities-rangko naljokgipa biapona rimjitani bidingo training aro exercise-rangko ong-atna nanga, aro unbaksanaba dingtanggipa bakrangkoba man-chapatna nanga jekai jakchi chin dake mesokanirang, specialized mobility equipment-rangko jakkalani, dingtang dingtang dake bilgrianiko man-gipa manderangko nama bewalo chel-chaka gnan nirok-simsakani. Duk-a-sel sokani ja-mano, PWDs-rangko ja-rikchapna gita skie on-gimin mandeko pilak search and rescue team-o donchapna nanga.
- Duk-a-sel sokna am-enggipana mikrakatsoanirang aro ua mikrakatsoanirango jinmana maikai u-iatna nangachim, ua cholrangko name basee dona nanga jedakode dingtang dingtang dake be-enni bilgrianiko man-giparanga ua u-iatanirango ma-sipana man-gen. Seng-gnan mikrakatsoani cholrangko law enforcement-ni, fire-ni ba gipin emergency response personnel-rang nokkoni nokkona re-e u-iatna man-gen aro ia cholrang ba bakrango manderang jemangan ku-ma ba nagok ong-achim uamangna emergency sign language-ko (jaksichi chin dake u-iatani chol), aroban nachil knagijagipa/ku-sik agana man-gijagipa manderangna telecommunication device-rangkoba man-chapatna nanga.
- Beenni bilgrianiko man-gipa manderangna jemangan dakchakaniko nangengachim, uamango naljokgipa biapona rimjitna gita re-na dona garirango aroban dakna-ka-na aro ja-rikna nanggnirango on-a nanga.

